

# OKATHI WO WIIRAANA NI ETHOONYERYO



Muhiileliwa. Oreeriwa okhala va ohiy'ula, ni weemela nipuro nla.

<sup>2</sup> Miyo, voosiis'ula, kirwaaka mphironi...Kaari wu kivekelaka, kaalipelelaka Apwiya. Nto kirwaaka mphironi, khumutthukula mu—murumeyi mmosa a muraatiyuni, Munna Smith, munna ooriipa (nyuwo othene moomwiiwa voosiis'ula? Ookhala wa nyuwo?) iwe, kookupali wira Ohio. Ookhala aakileela sa owo alaleyaka, nto khwira, “Nyuwo muhaana omutthukula yoowo,” siiso.

<sup>3</sup> Voohilipelela miyo khimutthukula, voosiis'ula. Ni vekeekhai owo aahimya moota etampi ehireery'aya molumwenkuni olelo, ni owo aari... Vano miyo khutthukula ohoolo vakhani, misoora mukina, khurowa khwiiwa mukina. Okathi ophin'ye aka va, kaari oohalela olikana, khuweha sinto khiwaaxiye vanceene wira kirwe okereja, voosiis'ula okathi ophin'ye aka. Tivo, hiyo vekeekhai khanireere oreeriwa okhala va ohiy'ula, ni orumeela mmutekoni mw'Apwiya.

<sup>4</sup> Nto kilavulaka mwaha wa Munna Neville, ni mutthaka nihiku nle, wa muhan'ola mwaamukhaani, munn'ihu onammala-ru orowa okhuma wa hiyo. Aari, hiyo othene noosuwela t'ani aari, aari Munna Weaver muthiyana. Ni kimuupuwelaka mulopwana mmosa va, oryeene opatisiwa ohiy'ula; owo...miyo kaahimupatisa mutankini mu okathi miyo...aahaana oruuhiwa va vakhaterani ya roota. Owo aamookhwa, mwaha wa kankuru, ni aarowa okhalana ohiyu yoole wira akhale; mameetiku yaaroomulopola, owo aarowa okhwa voosiisu aya. Vano miyo kaahirowa owannyawe khweeserya omuleela sa ovoniha wa Muluku, nto owo khutthikela ahimya wira, “Miyo nkimphwanela wira mukele mpa mwaka.” Owo khwira, “Miyo—miyo nkimphwanela wira mulaleyi akhale mpa mwaka.” Owo khwira, “Miyo ka natampi.” Masi khwira, “Mwenye, miyo nkinthuna okhwa siisa.” Nto siiso Grace Weber, nno, khukiroiha mpakha weiwe. Miyo kaammalaru orwa, kikhulumunweene mwaha wa mithukumano; nto vaavale okathi wanvekelel'aka, khimusomela Yoolempwa, vano owo khoopowa. Vano, owo khaawerya ovenxa ntata, masi aanitthuna ovahana ntata n'atthu othene. Owo paahi... yaahimukhumelela etthu.

<sup>5</sup> Nto okathi waavahan'aya matata, miyo kaahoono yoowoona ya owo arowaka veehilini, atthikaka. Miyo khwira, “Vaareera,

sothene sinoorowa okhala saana vano”; nto soovira iyaakha muloko ni thanu na tthaaru. Ni owo aahikhala etuphelo emosa ohoolo wa kankur’ule, okathi wothene. Vakhwiw’awe vale. . . Khakhwiye mwaha wa kankuru hata, waamuwereiye murima khumwiiva. Aahiheleliwa ettheke; owo okhwiye mwaha w’omuwereya murima.

<sup>6</sup> Vano nto miyo kaamuupuwela, wookiseryani pahi okathi atthu yaakhum’aya, ni wiipa, *Vano Yesu Aahirwa*. Vekeekhai ti yeeyo yaakhumelenle, Owo aahirwa khuurela ekumi awe iyaakha iye muloko ni thanu na mosa. Nto miyo khuupuwela, “Moota ephwanenly’aya.” Muthiyan’ole alakela khaasuwela wira aaira siisaale. Vano, tho, owo khino aahisuwela. Masi moota yaary’aya yoophwanelela okhalana epant’ile vale, *Vano Yesu Aahirwa*.

<sup>7</sup> Vano waari okathi vakhani ohinatthi, miyo—miyo kinwehererya, etthokiheryo aka yuulupale sa mithukumano. Kinikhala oonanariwa saana. Voosiis’ula, nkaareere ovelavela, mpakha orowa o—ovekela. Nto ki—kiri owaani, kootthikela va. Amusi, kinoomala—ru waaroiha wArizona, nto kiri. . . wira anamwane erowe oxikola. Nto kootthikela nno paahi wira—wira mwa enamuna emosa kimumule, kirowe kaxaye ni Munna Wood nnikhuru n’axinna va; orowa oxaya, esuman’ela enoorwa. Ninrowa oKentucky. Nto kaari. . . kaari mu. . . Khwiiraneya miyo ophiya nihiku nenlo—nenlo Muhano Weaver okhwiw’awe, ni khuwerya okhala va muhina m’okathi khimukhaliherya Munna Neville woovithani iwe.

<sup>8</sup> Nto miyo nkineererya o. . . nkineererya o—ohimaxexa yeeyo, moosuwela, vakhiviru n’atthu kiisinlihaka. Okhala wira, kinoona wira, emosa wa itthu sootepexa otakhala onkhala omoona mu—mulopwana wala muthiyana onisinhliha voohihyererya. Miyo kweekwe kinnuupuwelaka, “Muluku, mukaakiherye eyo.” Moone, eyo—eyo ennitteettheiha waamini okathi wothene, moosuwela. Nyuwo pahi—nyuwo pahi. . . nyuwo mwa—nyuwo mwa. . . Koosuwela wira okathi onuuluvaliw’aya, khula mmosa a hiyo, enoorowa onikhumelela etthu ni onikhumelela etthu. Ni koosuwela wira itthu iyo sikhaani sinoorowa otthikela sithukumanaka, eyo eniiraneya okathi onuuluval’anyu, sihaana wiiraneya tu. Masi kinoona wira emosa wa itthu sootepexa onanara, ti Satana omaliha ekumi ya mutthu: mulopwana wala muthiyana oowuuluvala oowunlaseya, moone. Miyo—miyo kinroromela wira nkimphiya vaavo. Kinroromela wira kinoowerya ovilela, miritti saka, ni—n’uphiyerya nipuro. . . kintthuna wira makhalelo aka ewarihiwe nleha ni Ovuwa wa Muluku: Ovilela Wawe, oreera murima, murettele, wiimaaliha, ni osareya Eroho Yowarya.

<sup>9</sup> Ni miyo. . . emosa wa itthu saka suulupale kweekwe sinikixankiha mwa makhalelo aka, onikhalaka mukhalelo w’onanariwa. Wira kakhalaru oolamwa, nto kinkhala oolamwa

pahi. Miyo kinkhala...kinoona ntoko khaavo oncaliwa, moosuwela, ni—ni munikhala othene... Ni nyuwo mookhalana, nave. Ni enniiraneya wira kinkhalana voowaattexa yeeyo, moosuwela, ni enikhala yootakhala imaara sikina, ni vannikirikela...Iwo wuukhuleya, ni ti yeeyo oniir'aya. Ni kinniphiyerya nipuro imaara sikina, vanci-enexa ni soowoona iye sinceene, moone, eyo enookivara paahi. Kinoomuweha mutthu, khuupuwela, “Éla ti yoowoona. Nnari, nnari, nnari, kehiyo. Ayo! Kehiyo?” Munnona? Ni nyuwo khamunsuwela esisapo xeeni enlinvwa ni yeeyo. Vano nto—vano nto nyuwo—nyuwo munimwiikoha. Nto munookhala muupuwelaka, “Ahe, nyuwo mwa...” Vano nyuwo munoopacerya otthokelela ni wira, “Ahe, vano, exeeni—exeeni kiiraly'aka? Miyo kiri va, miyo kirina—miyo kirina iyaakha miloko mithanu ni nkinatthi owiirela hat'etthu Apwiya; ni ki—kinimuuluvala. Nto exeeni...? Oh, wulu.” Vano nto munookuxa paahi...ele hiyo niihanak'ahu “wiiniwa murima.” Amosa-amosa wa nyuwo axinna a munnuwelo aka munnuupuwela ele yihaniwaka “okhalana eyiNELIWO murima.” Apaapa yaanihimyaka yeeyo nto miyo kaaniikohaka etthu yaahimy'aya, nto vekeekhai miyo kinnisuwela vano etthu yaahimyak'aya. Vano nto, munoopacerya woona siiso, ekhalaka wira khiivo ekhanle ekeekhai; ti nyuwo paahi, moosuwela. Moone, moosuwela, ti nyuwo paahi muniira eyo.

<sup>10</sup> Tivo miyo keeserya wiikurunuxa vakhani vano, ni wiilikanyiherya wi—wiilipiherya wuulupale onroromel'aka wira onimoorwa naanaano. Vano nto mwa...Kihaana orowa oNova Yorke naanaanoru, ni miyo...muthukumano mmosa weiwo, ekampaanya. Nto nuumala kinrowa oShreveport, vano kitthikele oPhoenix. Nto nuumala weetteetta onikela nsuwa...mukaano w'okuusini wa Estadu Unidu. Vano nto sinootthokihwiwa mikwaha sa ilapo s'okhopela vano, opacerya voohipisa ntoko sinwery'ahu n'upacerya eyaakha, khino Março, Abril, etthu siiso; ompaceriw'aya oEstokolmo wala Oslo, n'urowa mulaponi mothene, nawerya vale mukwah'ola ontharelana.

<sup>11</sup> Nto vano kiri owaani, kimumulaka vakhani, wira kitthikele okhalana ikuru n'upenuwa. Nto Apwiya yathuna vale, kinootthika oKentucky, Ettiminku enrwa. Ni—ni yakhalaru saana, yaasivela—ru Apwiya, ni Munna Neville aahicaliwe; ahe, kinimweeserya okhalana muteko Ettiminku enrwa, a—Apwiya yathuna vale. Ni Awo yathuna vale ntoko Munna Neville sinthun'awe, ki—kinookhala vaava. Ayo, mulopwana, Awo paahi ntoko...Awo yathuna vale yeeyo ntoko Munna Neville. Kinroromela wira Awo annithuna. Vano, moone, nto koosuwela wira kinookhala naanaano, Apwiya yathuna vale, kinoorowa okhuma wa nyuwo vakhani.

<sup>12</sup> Ni miyo...mitthaka mikhaani paahi, okathi onvar'aka etthu yaamukhaani vamurimani vaka, nto miyo—miyo—

miyo khunatthuna wooleelani yeeyo, moone, ni ninoowerya opatthana mwa yeeyo. Vano, kookhalana sinceene, mithanu wala mithanu na mosa sikirwenle mahiku vakhani ookiserya. Nto kaahirowa, mahiku manli va, oxaya mireyi nno. Vano kinookela mutakhwani, khukuxa elaapi ni epaphelo. Munnona? Vano wareera vale okathi w'othana, kiniphiteerya mwiri, nipuro nlo. Kaahirupe, kimpacerya ovekela, vano nto miyo, Apwiya anookivaha etthu, khupacerya olepa soolepa kamosa-kamosa sikhaani sa yeeyo, moone. Moosuwela enihimy'aka; mwakhala-ru meekh'inyu, vano nto nyuwo... Nuumala miyo kinookela mu, kinoolepa yothene eyo vakateerununi v'epaphelo. Vano nto kaihaniwa, kinootthimaka khukuxa ekateerunu aka n'uphavelasa ni wona etthu ekhanly'aka opacerya, moone. Ti yeeyo ekhumelenle naanaano va.

<sup>13</sup> Nto vano, kintthuna, Apwiya yatthuna vale, olavula paahi... Kineserya okhaliha... othikilela mitthaka iye, suulupale ni soolekela, moone; seiyo sinkuxa iwoora. Ni Apwiya yaahikikaliherya okhuveiha saana oChicago, ohiyu wookiserya weiwe, voophiyaka minuutu miloko miraru. Vano mutthu mmosa khurwa, khwira, "Nkuupuwelela wira vaamuweryaneya, masi muhiira!" Tivo minuutu miloko miraru, sa iwoora soophiyaka piili ni nuusu, wala tthaaru, moosuwela. Vano khino kinoowerya waakuva ohiy'ula n'ulimalela vakhani, ohoopisihani vanceene.

<sup>14</sup> Muluku ooreeriheni. Hata wira kinrowa woowi, khaninkhalakhala nikhalaka nipuro ntoko etapernakulu ila va. Nno owaanii, owaani wooreera. Ni kinnaasuru amusi Weaver. Vano ni munn'ola ooreera murima ooriipa okhwiye, kaahivekela ni yoowo okathi vakhani ohinatthi orowa, ni mukhalelo mmosa wooreera. Vano owo ori Owaani ni Muluku vano, nto sothene soomala. Ni mwaahaana orowa khula enamuna, ni hiyo othene noosuwela eyo. Tivo hiyo... Apwiya yitthyuuwihe minepa saya ni murettele, ni nihiku nlo ninniroromela okhala vamosa Muttetthe mmosa iwe, weiwo sihikhanle iretta, oxanka, wala okhwa. Mpakha va, nrowe niire sothene sinwery'ahu mwaha wa Ehapari yooreera.

<sup>15</sup> Olavulaka sa wuukhuleya, miyo kaamuvekela mwaha wa yeeyo voosiis'ula. Mwaarowa wira exeeni mwahaarina wuukhuleya? Muupuwele yeeyo paahi. Wuukhuleya oniira mpantte wa makhalelo. Eyo hata yaahikikalaliha okathi wupuuwenly'aka yeeyo. Mwahaakhala hata oowuukhuleya, mwaarowa okhala ntoko mwaatteepe a mattapwatta, khimwaarowa okhalana miyoonelo. Khiyaarowa okhala hat'etthu mwaakhanly'anyu oovaraka muteko. Ntoko iya ni mwaara, khino owo atthuna wira etthu, nto awo eneeserya ovara muteko vamosa (vanci-enexa aKristu), nto ole mmosa onatthuna... Vano nto okathi onkhal'anyu vamosa wira... nyuwo monoosuwela etthu iiraly'awe muthiyana; owo onosuwela... Moone, wuukhuleya vekeekhai onnookhalihani

vamosa. Nto mutthu onooleelani wira, “Ahe,” khwira, “mmuupuwele paahi mwaara mwaamukhaani wamphwannye wuukhuleya woowaatta okathi wahaary’anyu ooreera murima,” wala “iya wamphwannye wuukhuleya okathi wahary’anyu ooreera murima. Vano okathi sinlevelieliw’aya sothene, nwehe moota moon’anyu mwaha w’awo. Wulu, nyuwo paahi...” Moone, muhaana okhalana wuukhuleya. Ti yeeyo tu.

<sup>16</sup> Nto muupuwele paahi, miyoonelo, ankhi mwahaarina hata moonelo, wala owereya wala hat’etthu? Ankhi wahaakhanle owereya hata vakhani? Khimwaakhalana miyoonelo hata vakhani. Munnona? Ni mwaaharina hata moonelo, weso mmosa wa miyoonelo sanyu waammala. Munnona? Tivo, moone, sothene siri saana khula enamuna. Tivo, “Muluku, anivahe mahala wira nivileleke,” eyo t’itthu ene. Hiyo navenyaru paahi ni mahal’awo, ni weemela vale ni wira, “Hiyo noosuwela wira ekumi ila yamala vale, yuulupale emphwanyaneya epantte ekina weiwo omphavel’ahu orowa-wo.” Nto vano, hiyo—hiyo ninnuupuwela wira itthu iya sothene, iwo wuukhuleya.

<sup>17</sup> Wira, atthu kamosa-kamosa aneererya wooniherya oKristu, wira “munkhala oovuluwa mixankiho. Nyuwo mwa...” Nnari, khamunkhala. “Munkhala oovuluwa wukhuleya.” Oh, nnari! Munimuncererya wuukhuleya okathi onikhal’anyu muKristu, okhala wira mwaari ntoko oohicaliwa, munrowa khula enamuna, khula etthu yaari iwo, muhithokoreryaka etthu mwiir’anyu.

<sup>18</sup> Masi okathi onkhal’anyu muKristu eekeekhai, khula okathi munootthuna osuwela, “Kinnaasiveliha Apwiy’aka? Vaakhanle wira kinniwerya owiwa Yaawo!” Eyo enookhalihani oowuukhueya, enookhalihani oowiikasopa. Ti yeeyo enookhalihani etthu mury’anyu. Tivo tthiri, wuukhuleya eparakhaa. Ti enamuna onoonel’anyu paahi. Ti enamuna onoonel’anyu paahi. Munnona? Nyuwo mwaweharu epantte ekina paahi, yookhala—yookhala... Hata wira munthikila sayi etthu p’itthu muyevihaka, nlelo munkhalana ipantte piili sa yeeyo, moone. Vano munootthuna woona ipantte soopiili.

<sup>19</sup> Tivo wuukhuleya...Kinoona wira, “Oh, wulu, ti... Wuukhuleya nno exeenii? Vaakhanle wira vaamuweryaneya miyo oyariwa kihirina wuukhuleya.” Ahe, kahaakhalanne-ru wuukhuleya nno, nkaarowa okhala ele ery’aka. Nkaarowa okhala muKristu, khino. Ti wuukhuleya wenzo okiruu hale wa Yesu Kristu. Munnona? Tivo, onnikhala eparakha wa miyo.

<sup>20</sup> Vano nto, ntoko Paulo sihimaly’awe, vanamwi nlelo aarina wuukhuleya wala etthu ekina, owo aahaakoha Apwiya wira—wira ekumihe mwa yoowo vaara vararu. Vano Apwiya khwira, “Saulo, Yawaka... Paulo, mahala Aka anniphiyerya.”

21 Owo khwira, “Weso, kintthuna wiivuwiha mwa ohilipa waka. Vano kaakhalaka oohilipa, vaavo kinlip’aka.” Munnona? Vakhalaru wira ti ya vootthuna wa Muluku, vaareera.

22 Vano, miyo kaahaakoha Awo emara emosa okathi yaakihaaxak’aya vootepeya, yaanikitutuxa. Nto Awo khukileela, voophiyaka iyaakha thanu na tthaaru wala muloko sivinre, Awo khwira, “Eyo khenrowa-tho wootutuxani.” Nto khenatutuxeke tho. Nnari, mulopwana; muhi—muhixanke mwaha wa yeeyo. Miyo kinnoona yeeyo owereya vakhani, masi koosuwela wira eri vaavo; masi miyo kinookelela ohoolo paahi okhala wira khenkitutuxa-tho, tivo kinnixukhuru mwaha wa yeeyo.

Vano, khino Awo yamwiira, “Khonrowa-tho okhala,” siiso ntoko, “Khamunrowa-tho otuthuwa.”

23 Tivo iwo p’utthuna Waya wira yiiraneye, tivo miyo kinoopatikha eyo ni wira, “Kooxukhuru, Pwiya, kinaamweetta siiso.”

24 Vano, nrowe nuurame miru sahu okathi vakhani paahi wira—wira nivekele. Yookhala yoovekela y’omeekha wira evekeleliwe? (Kinnoona wira maleeso amphwanyaneya va.) Nvenxe ntata nanyu. Pwiya, mmureerihe khula mmosa w’an’Inyu.

25 Tith’ihu a Wirimu, okathi onaattamel’ahu Ehice Anyu vano, yoottittimiheya ya mahala, okhala wira noolattuliwa wira nirwe. Hiyo ninoorwa n’ulattula wa Yesu Kristu. Ni ninoorwa ni ovelavela wahu wothene, ni ninhela mwa Yoowo okhala wira Owo onninkhapelela. Moota okhanly’aya okurunuxiwa murima wuulupale, osuwela wira Owo onninkhapelela. Muluku muulupale a Wirimu, Mpattuxa, onninkhapelela hiyo, soopattuxiwa Sawe. Hiyo ninnixukhuru vanceene mwaha wa yeeyo, Pwiya. Moota okhanly’aya okurunuxiwa murima okathi ula onkhal’ahu, vanikhal’aya ntoko ninwerya o—ophwanya okurunuxa murima mwa Masu Anyu paahi. Iwo p’ukurunuxiwa wahu murima, ti Natiri Anyu. Nto muhina wa Natiri Anyu, Nyuwo muhimye wira nisuwelihe soovekela sahu, ni “Nvekeleke etthu p’itthu mwa Nsina Naka, Miyo kinimwiira.” Ni Anatiri ala othene aalupale: “Nvekele muoovahiwa. Mwiirele mwaak’ola, ‘Othame-vo,’ muhihoverye, owo onoothama.” Anatiri ala othene, ni hiyo ninoowerya okumiha mwa Yeeyo etthu yeeyo envekal’ahu.

26 Matata aavenxiwa, awo anthuna etthu, Pwiya. Nyuwo munnisuwela sootthuna saya; mwaaphwanyihe, Tithi. Miyo kinhela mavekelo aka ni awaya ohoolo Wanyu, ntata naka novenxiwa ni awaya. Va amphwanyaneya vapulpitu va, maleeso ari va. Oh, moota atthu arina waamini, waamini woominyala, Pwiya. . . Enikhala ntoko etthu Nyuwo munikireerihan’anyu ni yeeyo, owerya vaavekelela atthu aretta. Nipuro pi nipuro, khula vatthu, mapuro thene onrow’aka, enikhala etthu yo waavekelela

aretta. Muluku, mukhaliherye vano. Miyo kinvekela vaxariya-vo wira Nyuwo muvahe soovekeliwa sa maleeso ala apwehiwe va, athu avekenle. Omoriwa Wanyu ikharari okhale mwa yaawo.

<sup>27</sup> Pwiya, hiyo ninnisuwela wira Munna Hicks muthiyana ookhalana muthiyana mmosa va, ovanve okhuma nipuro nimosa ottaiwene wira ovekeleliwe, orina kankuru; ni aathuna osuwela sinto aamuwerya omuruuha va. Miyo kinnivekela, Muluku, wira muurele ekumi ya mutth'uwu; munivahe. Musulu aka mwaamukhaani, Mikie, ommaathale vale onwereiwa ni orapheyasa, orina ettekuxa yoovihaxa, onoomalaru okhuma vamukhora. Pwiya, miyo—miyo kinnaamini wira nihiira mavekelo o waamini iwe wira Nyuwo muheemexa, ni miyo—miyo—miyo kinnooxukhuruni Nyuwo, woonaka ettekuxa omuhiya mmirav'owo kihinatthi okhuma musaala.

<sup>28</sup> Vano, Pwiya. . . ni kooxukhuru mwaha wa itthu iya sothene. Vano enikitthuna miyo olavula Masu Anyu. Munivahe Masu Anyu, Pwiya. “Masu Anyu ti Ekeekhai.” Mureerihe minepa sahu ni munivahe ma—mahala antthun'ahu, wira niwerye okumiha mwa Anatiri a Muluku ohiy'ula, mwa Masu, wira enikhaliherye eriyari ya esumana ela; munivahe. Mmureerihe pastore ahu, munep'ola wooswanyeya, amwaar'awe, an'awe, matiyakono, maatiministratoore, ni khula mutthu onkela wala onkhuma emp'ela; munivahe, Tithi. Mwa Nsina na Yesu Kristu hiyo ninvekela iparackha iya. Amen.

<sup>29</sup> Vano, kintthuna kisome mapuro manli a soolempwa s'Apwiya. Kintthuna kisome toko Eliivuru ya Masalmo, Esalmo 86. Vano nuumala kintthuna kisome mwa Matewu Oowaarya, kapiitulu 16, 1 mpakha 3. Ni kintthuna kisome nipuro na Esalmo ila, kahi yothene masi mpakha ophiyerya eversiikulu 11, eri ovikana vakhani nuusu na yeeyo.

<sup>30</sup> Ni kintthuna kihimye ela, vakhala wira kiihane yoosoma, kihinatthi olaleerya: *Okathi wo Wiiraana Ni Ethoonyeryo*. “Ethoonyeryo y'okathi wo Wiiraana,” eyo enikhala ntoko yootikiniha vakhani. *Wiiraana* (Munnona?) *Okathi*, okathi wo wiiraana, ti yeeyo ekhanle vano. Ni *Ethoonyeryo* ya okathi yoowo wo wiiraana.

<sup>31</sup> Mu—mwa Masalmo, nivekelo na Davidi, Esalmo 86.

*Muuramihe niyaru nanyu, O Pwiya, mukiwe: tthiri miyo kootakhaliwa ni ka masikhini.*

*Mukhapelele munep'aka; maana miyo koowaarya: O Muluku aka, mmoopole murumeyi anyu onoororomelani nyuwo.*

*Mukimorele ikharari, O Pwiya: miyo kinookhuwelelani nihiku ti nihiku.*

*Muhakalalihe munepa wa murumeyi anyu: maana wa nyuwo, O Pwiya, kinnivenxerya munep'aka.*

*Tthiri nyuwo, Pwiya, mooreera murima, ni oolikana wira mulevelele; ni oosareya othunku w'ale othene anoovekelani.*

*Mwiwe, O Pwiya, mavekelo aka; . . .nwiriyane masu a ovekela waka.*

*Nihiku noovelavela waka kinniwiihanani: nyuwo munnikaakhula.*

Oh, kahi yooreera yeeyo? “Nyuwo munnikaakhula.”

*Eriyari y'amuluku khaavo onlikana ni nyuwo, O Pwiya; khasivo miteko sinlikana ni muteko anyu.*

*Maloko othene mupattunx'anyu animoorwa wookokhorelani nyuwo, O Pwiya; nyuwo munoovuwaha nsina nanyu.*

*Tthiri nyuwo mwa muulupalexa, ni munniira sootikiniha: nyuwo paahi muri Muluku.*

Nwiriyane vano:

*Mukithoonyerye ephiro anyu, O Pwiya; miyo—miyo kinimweettela ekeekhai anyu: mwiiraanihe murim'aka wira kooveke nsina nanyu. (Omosa! Munnona?) . . . mwiiraanihe murim'aka wira kooveke nsina nanyu.*

<sup>32</sup> Vano kinlavula mwaha wa wiiraana ni ethoonyeryo y'okathi. Vano, kapiitulu 16 ya Mawewu Oowaarya:

*Afarisi n'aSatukhi yaahirwa, . . .emweereryaka owo, yaahinkekela wira awooniherye ethoonyeryo enkhuma wirimu.*

*Vano Owo aahiwaakhula khwaahimeerya wira, Waphiya makaaripi, nyuwo muniira, Miyo . . . Onookhala okathi wooreera: maana wirimu khureere oxeerya-wo.*

*Vano voosiisu, Olelo enoorupa epula . . .enookhala ettheke olelo: maana wirimu ti wooxeerya-wo ni wooriipela. O nyuwo anawoothe, munsuwela oatphulela makhalelo oosulu; muhinsuwela sayi otaphulela ithoonyeryo sa okathi ula?*

Apwiya yincererye iparakhha Saya sooreera osoma wa Masu ala.

<sup>33</sup> Vano, ninlavula wiiraana wenna, okathi wo wiiraana; ethoonyeryo y'okathi wo wiiraana. Moone, Yesu aari muumu, osoma nno wookiserya wa Yoolempwa, Owo aapwapwela anamukuttho mwaha w'ohiweryaka otaphulela okathi wala ethoonyeryo y'okathi. Vano, eyo kweekwe ennikhala ethu yuulupale w'atthu, moone, owerya otaphulela ethoonyeryo y'okathi onikhaliwa; okhala wira Muluku onnilepa voowooneya wira ohikhale onwerya otthyawa eyo.



<sup>34</sup> Vano, voolimaleleya, kaamuhokolowa kaahimye alaleyi akina, arumeyi akina a Apwiya mwa okathi wa Bibilia (ntoko ethoonyeryo y'okathi wa Nowe, ethoonyeryo y'okathi wa Daniyeli ni—ni sikina, ithoonyeryo soohiyana-hiyana), masi kintthuna kihyeye eyo ohiy'ula wira—wira kuurele okathi, wira kiwerye. . . Masi kweekwe enikhalaka enamuna ya Muluku, waavaha e—ethoonyeryo y'ephattu ya okathi, wira athu othene esuwele vekeekhai okathi xeeni waari—waari uwo. Nto aFarisi ala yaahaana wira esuwenleene okathi aya. Awo yaahaana wira esuwenleene waari okathi xeeni. Owo oohimya nipuro nikina, “Mwaakisuwenle Miyo, mwaamusuwela nihiku Naka.” Munnona? Eyo—ti yuulupale e—etthu yuulupale saana wira nisuwele saana. Moone, “Vahikhanle osuwela saana!”

<sup>35</sup> Ti yeeyo awo kweekwe yaahimeryak'aya maprofeta, awo yiirale, “Ni owo aahikhalana osuwela saana, ni soowoona saakhuma w'Apwiya. Ni Masu a Apwiya jaarweela ma—maprofeta a khalayi.” Moone, awo yaanisuwela saana Masu a Apwiya, mwaha wa maprofeta. Vano nto, maprofeta annivaha ethoonyeryo. Ntoko, mulopwana mmosa aammaathale ni iparari sawe okathi munceene, vano khurukunuwa khummaathi ni epante ekina. Mulopwana mmosa aahaana orula ikuwo sawe. Nto oh, sookhala itthu sinceene awo yairaly'aya wira yooniherye ethoonyeryo awo yaakhal'aya-mo. Nto vano hiyo noosuwela wira Muluku opattunxe erimu ni vathi, ni—ni mwa enamuna emosa aahitthokiha muteko Awe wira Owo aarowa wooniherya okathi Awe ni ethoonyeryo, Muluku yoowo onnikhala olelo. Tivo nihaana okhala, etthu. . . Noonaka o—okathi onikhal'ahu, ehaana okhala etthu mutthu ehinooon'awe, nipuro nlo. Munnona? Okhala wira Muluku khaarowa otthuniherya itthu iya wiiraneya ohinivanhe ethoonyeryo yoosuweleya, wira vaavo, wira—wira hiyo nisuwele saana.

<sup>36</sup> Vano va t'eri etthu ene olelo, wira alaleyi, hiyo khaninsoma orateene. Ti siiso saary'aya okathi ule, awo khayupuwela wira waari p'ukathi. Awo—awo yuupuwela wira yaakhala vooaaleleya saana nto, nto tivo awo khiyaamuwehererya hata Mesiya. Nto Yesu oohimya wira Orwa Wawe waarowa okhala “ntoko nawiiye ohiyu,” okathi a—atthu jaarow'aya okhala oohikasooa wa Orwa Wawe. Masi yaahikhala aximwali kamosa-kamosa yaaronwe okumana ni Yoowo, nuusu n'awo, jaarina makhura muxamaniyani mw'aya ni yaailikanyin'he; awo yaaniwehexexa ethoonyeryo yeeyo. Nto ti yaawo kinlavul'aka-no ohiy'ula, moone, ale anwehererya ethoonyeryo naanaano, ethoonyeryo ya Orwa Wawe.

<sup>37</sup> Ithoonyeryo iya sivaheriwe, n'Apwiya, anvahiwa alipa-oowaamini paahi. Alipa-oohaamini khankhalakhala yoonaka. Iyo sinaavira vasulu, ni khaanoona. Nto vano, vekeekhai ntoko Nlaikha na Muluku naarow'aya weemela vaplataforma va ohiy'ula, vekeekhaixa ntoko—ntoko sinooweh'akani,

ni kaamuwerya okhala kiwehaka nenlo; wala nyuwo mwaamuwerya okhala nwehaka nave miyo khuhinawerya woona, wala kaamuwerya miyo oweha nave nyuwo kuhuwiwerya woona. Vano, nyuwo moosuwela wira eyo ti Yoolempwa; eyo Ekeekhaii voolikana. Awo yaahoonā . . . Nyuwo moosuwela wira Paulo aahimora khwiipopheya, masi awo . . . khaavo mmosa w'awo aawerya woona Muthuk'ole.

<sup>38</sup> Muthuk'ole waari vaavale okathi Yohani eemenly'awe ohoolo wa mittitthi s'atthu, n'atthu ikonto sene mukerekhere mme, w'anamukuttho ni—n'asuweli, atthu oottittimiheya. Vano Yohani khwira, mmansawe, o aahikhalela onamoona woona Eroho ya Muluku ekhuruwaka ntoko epompa khukhala vasulu Vawe, ni Nsu naahimya wira, "Ola Mwan'Aka onimphentex'aka mwa Yoola onnikisivela okhala." Nto khaavo oonale Eyo woohikhala Yohani paahi. Munnona? Yaari ya yoowo paahi.

<sup>39</sup> Mooweha mootā ethoonyeryo, yaary'aya yoowooneya w'asuweli? Awo yaarooewehasa, yaahikhala . . . Awo yaari aHeperi. Awo vekeekhai khayaari anamasoma ittheneeri aHinti, yaari aHeperi; okhala wira awo yaarisa iwe elapo ele esomaka ittheneeri, wira emaliherye osoma waya. Nto okathi awo yaary'aya . . . khuwehasa oYesrusalemu, ni esuwelaka wira yaahoonā ittheneeri iye tthaaru khula emosa wa—wa ephiro aya yooyariwa—wo, sa Khami, Semi, ni Yafeti, maloko yaawo yaakhumans'aya, khula mmosa, awo khoona ittheneeri iye mwa ephiro aya yooyariwa—wo. Eyo yaari ethoonyeryo w'awo, wira okathi ittheneeri iye saary'aya soothataana, Mesiya aari elapo ya vathi.

<sup>40</sup> Oh, wulu! Khivanxankiha awo jaarwanse aya, "Ori vayi Yoowo? Ori Ole oyariwe Mwene a aYuta? Hiyo nrimoona Ettheneeri Awe Onikhuma nsuwa, khurwa wira nimukokhorele. Ori vayi Yoowo?" Awo yaanisuwela wira mmirav'ole Mesiya aataleliwe nipuro nlo, okhala wira Muluku aahaavaha ethoonyeryo y'okathi, wira Muluku n'atthu yaamwiiraana vamosa. Omosa xeeni, okathi Muluku iiraanne awe Mmansawe mw'erutthuni ya mutthu! Wuulupalexā, wiiraana wuulupalexā otonko wiiriwa, waari okathi Muluku iiraanne awe ni mutthu; ni aahiyale Wawawe—mukhalelo Awe muulupale w'okhala Muluku khookola eheema Awe khukuxa omutthu, khukhala mmosa w'awo, wira aavuluxe. Omosa. Eyo yiirale exeeni? Eyo jaaruu hale murettele Muluku ni mutthu voohimala—tho. Mootā niry'ahu ooxukhuru.

<sup>41</sup> Nto ithoonyeryo khasiveleelihiwe . . . Vano muupuwele paahi, khula mutthu, ni anamasoma ittheneeri othene; atthu, mahiku ale, iroroco saya saari ittheneeri. Aahikhala mulipa—oowehaweha aawelaka osulu va na—namukattha, vano owo aamuwela vo n'uweweha. Vano owo aanoona okathi ittheneeri kamosa—kamosa saakhal'aya munikhuruni, okathi saavir'aya, owo aanisuwela waari okathi xeeni. Munnuupuwela mwa

Yoolempwa, “Okathi xeeni ula, mulipa-oowehaweha?” Vano namawehaweha aahitthika khumuhimeerya okathi xeeni wari ule. Moone, awo yaaweha okathi mwa ittheneeri.

<sup>42</sup> Vano, kahi yootikiniha wira ittheneeri iya saari soothataana w’axilopwana araru ni khaavo mukina oonale? Munnona? Voothataana oratteene. Vano, nyuwo pooti okhala oolikana saana ni Yoolempwa. Munnona? Okathi ittheneeri iye sikhany’aya vamosa, siitakany’aya vamosa mwa nikhuru nla, alopwana araru yaari vamosa nave okathi ene yoowo. Nto nyuwo pooti okhala oowiiraana ni Muluku, mwa Masu Awe, mpakha itthu iya okhala ikeekhai, ni munoowerya woona ni osuwela wira ti s’eekhai. Munnona? Ethoonyeryo y’okathi! Nyuwo pooti ovonya oweha, wira, “Ah, ethiru!”

<sup>43</sup> Masi wa *nyuwo* eyo kahi ethiru. Wa nyuwo, muhiiraana ni Masu, nto t’Ila eri va. Vano owo—owo Muthuko voomalela, Munna Pat, okathi—okathi—okathi—okathi onoon’anyu ethoonyeryo ela okhala omosa ni mulipa-oowaamini. Nto ti yoowo onimuroihel’aka yeela, mulipa-oowaamini, maana mulipa-oohaamini khaanoona. Nto opwapweliwa xeeni waarowa okhala vaakhanle wira Owo ori mulaponi olelo, w’anceene w’alaley i ahu olelo, ahinwerya osoma ethoonyeryo ela; ithoonyeryo sinsom’ahu nihiku ti nihiku va otapernakulu, ni woona itthu. Nto akina annisoma ni woona yoolempwa vaxirini, nnakhala vo anceene anoohiya paahi, ni khaanoona hata vakhani. Kehiyat hat’etthu w’awo nnakhala; awo khaniweha.

<sup>44</sup> Vano nwehe, wira mwa yeela, wira Owo—Owo aahimyale ithoonyeryo sa mulaponi. Vano, okathi awo amukohaly’aya yeela, awo yaatthuna ithoonyeryo; vano owo khwaavaha ithoonyeryo saakhumelenle. Nto awo yaatthuna osuwela okathi xeeni waarowa okhala emalelo y’olumwenku, t’ivi yaarowa okhala ethoonyeryo woomalelani. Vano owo khwaahimeerya mapuro manceene mwa Yoolempwa ithoonyeryo sa mulaponi, sa ethoonyeryo wirimu, ni ethoonyeryo ya vathi; Owo aahaavaha ithoonyeryo, ethoonyeryo, ithoonyeryo, ethoonyeryo vooihiyererya. Vano okathi...Owo aahaahimeerya mmo wu nipuro nimoso ya ethoonyeryo ya mulaponi. Owo iirale, “Moonaru ilapo,” moone, “opacerya othukumana simurukureryaka Yerusalemu,” moone, vano noosuwela wira okathi w’oxanka waya ori vakhiviru, “moonaru muttethe w’oYerusalemu okutteleliwe—ene n’anakhotto.”

<sup>45</sup> Vano, awo ehinatthi wira ela, Muluku...olumwenku waahaana wiiraana. Tiitu, mukhulupale anakhotto ola a oRooma, aahaana owiiraaniha anakhotto awe vamosa khurwa, nuumala aYuta ala okhotta ethoonyeryo y’okathi yaavaheriwe ni Muluku w’awo. Owo p’ukathi Tiitu aawiiraanin’awe anakhotto awe vamosa, khurwa wira okuxe muttethe. Yoopacerya waahaana okhala wiiraana w’atthu a Muluku (aniihaniwa siiso) evirikanyaka Masu a Muluku, nloko nle nihinatthi wiiraana

mmansaya naavirikanyaka atthu a Muluku. Moone, o—o—omosa, wiiraana; wiiraana vamosa.

<sup>46</sup> Kookupali wira hiyo ninkhala okathi muulupale wo wiiraana. Miyo kinihimya mithuko iya sooxeerya, ni ithoonyeryo sookarya ni sothene (s'athiyana, moota aniir'aya; ni alopwana, moota aniir'aya; ni ikereja, moota siniir'aya), kooniheryaka nikhuru nla naamukhaani, ni murim'aka wothene, wira kinnaamini wira hiyo ninthataana muliinyani mwa Masu a Muluku mwa okathi ula muulupale w'oprofeta, okathi vakhani ohinatthi Orwa w'Apwiya Yesu; niiraanaka vamosa ni niilikanyihaka.

<sup>47</sup> Vano, moone, Tiitu ahinatthi wiiraaniha ilapo vamosa sa... anakhotto awe vamosa, Isarayeli yaahiiraana vamosa khupathhana, wira khiyaarowa waamini wira Yesu aari Mesiya. Awo yaahimukhootta Owo, khumoomola, khumukhomela. Vano nto, okathi akhottaly'aya woopowa yaaveleeliheriw'aya, awo yaahiiraana vamosa wira yiire yeeyo. Vano, muhele yeeyo mmuruni: wiiraana vamosa, wira emukhootte Mesiya a okathi! Awo yaahaana wira yeeyo. Vano nto vairaly'aya siiso, nto ethoonyeryo ya mulaponi khurwa.

<sup>48</sup> Ilapo khupacerya wiiraana vamosa, nto Tiitu khuruuha muttitthi ula muulupale w'anakhotto w'aRooma ni Akreku khukuttelela ixiri sa oYesrusalemu, khwaatekelela atthu ale muhina mme vano, awo khukhwa mwaha w'etala. Awo yaahikhuura mapapatthu a miri. Josephus, mulipa oolepa ihantisi muulupale, onninihimeerya. Nto awo yaahikhuura malaxi vathi. Awo yaahiwaapeya hata aana aya mmosa ni mukhw'awe khwaakhuura; moone, ntoko atthu oovahuwa. Vano nto okathi, vookiserya, Tiitu, owo aari wiithela wa miyaako, omurukurenryeene Yerusalemu vale, nto—nto atthu ale mme yuupuwela wira yaaira otthuna wa Muluku, okathi yaawoonaly'aya anakhotto ale yeettaka erwaaka. Awo yaahikhotta omwiiwelela Mwixuttihi Muulupal'ole, Pwiya Yesu, waaleela yeeyo.

<sup>49</sup> Khaakhanle hata mmosa w'aKristu ale aavariwe mme, okhala wira awo yaahoon ethoonyeryo khukhuma. Munnona? Awo yiirale, "Ole ori vataratoni ahikhuruwe, wala ole ori omatta ahitthike, ahikuxe mukhumi awe; masi mutthyawele oYuteya, ni mulompeke wira otthyawa wanyu ohikhale eyiita wala nihiku na Saapatu." Okhala wira, okathi w'eyiita, mi—miyaako saarowa osareya etthapwe; ni nihiku na Saapatu, mukhora—mikhora saahiwaliwa, mukhora, nto awo yaamurowa ovariwa mwa mukhalelo yoowo. Munnona? Ninthuna niphaye mwa yeeyo voohipisa wa e... moota Muluku oniir'awe ithu iyo, Apwiya yatthuna vale.

<sup>50</sup> Nwehe vano, Owo... Awo yaahilompa wira ekhale yeeyo... ehikhale siiso, Yesu aahaalela wira elompeleke yeeyo, ni awo

khayaamuphwanye hata mmosa w'awo mme. Awo yaahirowasa 'okhala wira yaahiweha ethoonyeryo, ni yaahirowasa; ti yeeyo tu yaakhanle.

<sup>51</sup> Oh, moota ikereja olelo saatthuney'aya woona ethoonyeryo y'okathi onikhal'ahu! Mutthyawele oKalvaro voowaakuvexa sinwery'anyu, wira mphwanye Ekumi; kahi mukereja, masi wa Yesu Kristu. Mwiiraane ni Yoowo, nto kahi ni mutthenkeso wala eyaaminelo ya ekereja. Mwiiraane ni Kristu, ni mukupali wira ti Yoowo. Muhikuxeke etthu p'itthu paahi, muhaana okhala eekhweli wira ti Yoowo. Okathi xeeni wo wiiraana!

<sup>52</sup> Vano, ninnoona wira awo yaahimukhootta Mesiya khwiiraana vamosa khupaka mwiiwanano, khupaka e—e... evaanelelo yaaworu wira mutthu ti mutthu aarowa omwaakhela Yesu ntoko Profeta, wira awo yaamoomoliwa mukereja. Munnimuupuwela mmirav'ole ahoona aaphwanyaneya ni maitho oohoona? Nto awiixutti khwira, "Ti pani otthenke? Owo, wala atithi awe, ame awe?"

<sup>53</sup> Nto Yesu khwira, "Mwah'ola, hata mmosa w'awo; masi wira miteko sa Muluku sivariwe, sisuwelihiwe."

<sup>54</sup> Vano nyuwo muupuwele, awo yiirale wira atithi awe n'ame awe khayaawerya ohimya. Awo yiirale, "Awo aasuwela wira ola mwan'ihu, masi khanisuwenle moota sivonihiw'awe." Okhala wira aYuta yiirale wira khula mutthu aarowa omweemererya Owo wira aari Profeta, wira yaamurowa woomoliwa.

<sup>55</sup> Masi, moone, miteko sa Muluku saari wira mmirav'ole khiira mpantta wa nikhuru nle. Nto owo khwira, "Vano, etthu yookitikiniha nyuwo ohisuwelaka vakhummy'awe Mulopwan'ola, nto nnakhala vo Owo ookivaha woona." Munnona? Vano, owo aaniwerya ohimya eyo. Moone, iyo saari miteko sa Muluku. Owo aahivonihiwa, ni vano, ni owo aaniwerya—aaniwerya ohimya okhala wira khaarina hata ivarihanelo ni hata nipuro. Yaari mwa yoowo miteko saavariw'aya, ni vekeekhai owo aahoona yawawe...emaara yoopacerya ookhalaru.

<sup>56</sup> Vano, aYuta yaahiiraana mmansaya envirikanyaka Yesu ni—ni evirikanyaka oMesiya Awe, ni Mutthaka Awe w'oMesiya. Hiyo ninnoona etthu emosa yeeyo vano ekhumelelaka, etthu emosaru yeeyo. Komunismu onimwiiraana wira ohonone kereja, nto enamuna emosa paahi...owo okathi ekereja enir'aya yiiraane nave, Mmwaataanoni mwa Ikereja, Mwaataano wa Ikereja sa Molumwenkuni, wira ekhootte ni ehonone Mutthaka, Masu! Awo aakhootta Masu, ikereja sookhootta! Khanwerya waakhela Yaawo okhala wira annivirikanya eyaaminelo ya muromolelo aya; hata wira Malumi makavi a Mooro yaarowa wiithomeya wawihu...eriyari y'atthu, wala atthu akavi yaarowa okhala... itthu kavi saarowa ohimmwa khalayi ene ni wiiraneya, ni

ithoonyeryo sothene suulupale Owo aahimaly'awe sa nihiku nookiserya; awo khanwerya okupali.

<sup>57</sup> Tivo, awo animwiiraana vano, ni pastore anyu va ni anceene anniwerya wooleelani, wira annisoma, wira awo a . . . aakhalana mweettelo w'elapo wothene wa mo—mo—molumwenkuni. Nto e . . . ookhala mulaleyi mmosa Luteraano vasulu va yeeyo. Wira, yarwa vale ehasara, wiiraneya mutteth'ola nno; naahikhale oowiiraana ni mweettelo yoowo w'elapo yothene, nto ekerej'ahu khenkhala—tho ekereja, ni awo anoowerya orumeela ntoko empa y'ohela itthu. Wala mmosa wa hiyo axinna amoonaru mutthu akhwaaka wala oovulala, ni weererya omulaleerya eparakha ya Eroho, vaamuweyaneya woopeliwa mwaha wa yeeyo; vekeekhai voolikana. Hiyo pooti ophwanya otthukweliwa mukhatteya feteraale iyaakha muloko mwaha w'olaleerya etthu p'itthu, okhala wira hiyo khaniniira mpantta wa mweettel'ola wa elapo yothene. Khamunoono ekanyeryo ya nxeni? Munnona? Munnona?

<sup>58</sup> Vano, hiyo ninnoona okathi ula wo wiiraana ophiyaka. Munnona? Vano, nwehe! Vano nto ekereja ehiiraana mmansaya evirikanyaka Mutthaka; vano nto okathi eniir'aya siiso, ilapo sinimwiiraana muKominismu wira ehonone—tho ekereja; vekeekhai yeeyo yiiraly'aya emaara yoopacerya. Munnona? Enoothikela yothene vasya.

<sup>59</sup> Isarayeli aahaana okhootta Mutthaka toko. Vano vakhottaly'aya Mutthaka, nto anakhotto, makhalelo a elapo khwiiraana vamosa (a ilapo sikina), khurwa khuhonona ekereja. Nto olelo, awo aakhootta Mutthaka wa Pwiya Yesu, ni aakhootta Yoowo. Nto vano, okathi onoophiya vaavo Komunismu oniiraanih'awe olumwenku vamosa ovirikanyaka ekereja. Moone, ehaana okhala siiso. Vano, ti yoolipa ohimya yeeyo.

<sup>60</sup> Yaari yo waarikela aYuta ale waamini. Awo yiirale, “Vano murwe, axinna, ninoona wira—wira awihu—Muluku ahu ori ni hiyo, nto tivo hiyo—hiyo nnoorowa mpaani m'okokhorela. Nto vano ninoorowa olompa, ni muhiye phaatiri Oowarya *Lexe ni lexe* ni phaatiri oowaarya *Lexe ni lexe* ahoolele mavekelo. Nwale mukhora!” Vano Tiitu khwiikhaliherya, khukhala weiwe voophiyaka eyaakha ntero wala ovikana. Moone, owehawehaka, khuwiiva etala. Khaavo hata mmosa w'awo hata aaphiya ota wa muttethe; vano awo khukhwa, yaahikhwa etala. Nto okathi okenly'awe mme khuphomola ixiri, ephome khuvuuva khuyeeheya ntoko muro iwe weiwo owo aivaly'awe sothene saari mme.

<sup>61</sup> Vano, Nlaikha n'Apwiya naahihimya yeeyo, ottuli mwa Waataana Wa Khalayi, kuhimya wira eyo yaamukhumelela. Vano arumeyi ale, yaari anamukuttho, vaatthuneya wira esuwele saana yeeyo ni wira yaaleele yeeyo athu, ohiya vo, okathi

Yesu aary'awe eriyari aya, awo nnakhala khiyaamusuwenle; ni yeererya opaka e—e... muthinto mmosa wa nna—nnawu na namarokolo, “Munipakele ethepyelo emosa, munihiye noone moota—moota eniiriw'aya! Munoonihe ethoonyeryo.” Munnona?

Nto Owo khwira, “Miyo...” Vano, Owo aahiira ithu sinceene, nnakhala vo awo khayaawerya woona. Munnona? Vano nto okathi amukhoottaly'aya Owo ntoko awaya... Mutthaka wa nihiku nle, awo yaakhoottale Mutthaka wa nihiku nle.

<sup>62</sup> Awo yaahivonya woona ethoonyeryo ya nihiku nle. Ni ethoonyeryo ya—ya oprofeta ya Bibilia yaahiiriwa ohoolo waya, nto awo khwira, “Nrowe nikele vano!” Awo yaari athu oowaarya. Awo yaari athu yahaaweryaneya waapweherya ekatha anyu mmakhaleloni mwaya. Khivaaweryaneya awo okhala *yeeyo*, vano nto—vano nto enakhala na—na—namukuttho. Namukuttho aamwiiwiwa, aamuvonyakasiwa maluku mpakha okhwa mwaha w'etthu yaamukhaani. Tivo owo aahaana okhalana makhalelo, ooreera ni ooloka. Owo khaakhanle wira, okhala wira aamuvonyakasiwa mwaha etthu p'itthu. Nto vano awo yaari athu aalupale, ni athu oowaarya vamaithoni v'atthu, nnakhala vo awo khukela khwira, “Vano, hiyo nno... Hiyo nookhalana Muluku, Muluku Yoole onkhala ni hiyo othene moovirani w'okathi. Hiyo nnookela mpaani mw'Awe mookokhorela moowaarya.” Ele yaari empa y'okokhorela ya Muluku yoowaarya! Masi, moone, Owo aahikhottiwa mpaani mw'Awe mookokhorela moowaarya. Munnona? “Hiyo nnookela mpaani mw'Apwiya. Vano othene nyuwu aHeperi moosuwela wira hiyo na nloko nithanliwe, hiyo na nenlo, va. Ni Muluku ti Muluku ahu; Muluku a Abrahamu, Isakhi, ni Yakope. Owo ori ni hiyo. Owo onoonivuluxa w'aFilisti ale oohilyihiwa masoma iwe (p'uhimya wene), aRooma ale n'aKreku. Owo onoonivuluxa mwa yeeyo. Nrowe nikele mpaani mw'Apwiya!”

<sup>63</sup> Eyo yaakhala ntoko yooreera; masi awo yiirale exeenii? Namateka empa aari memme, mwa mukhalelo wa kalapintero oowiiyeviha muKalileya, vano awo khimukhotta; okathi Muluku aamulipihenry'awe wira aari Namitthaka Awe a okathi, ni Yoophuwa. Vano awo khukhotta Eyo. Tivo mavekelo othene, oxariya wothene, mikuttho saya sothene khasaahimya etthu wa Muluku. Awo yaahiira! Nto Muluku khuhiya muttitthi ula muulupale w'anakhotto ohonona ela.

<sup>64</sup> Nto hiyo ninnoona olelo, moota ikereja muhina mwa miromolelo ni sikina, sinkhoott'aya Masu a Muluku. Awo khandthuna wira mwaaleeleke ithu iya, ni siyensiya onniwerya olipiherya yeeyo ni ilarataro ni sothene sikina, nnakhala vo awo khandthuna okhala nnaata n'Iyo. Tivo komunismu onimwiitthokiha wira ohonone, siiso ntoko Tiitu siiraly'awe, ni Bibilia ohimnye wira awo yaamwiirasa. Voolikana-ene!

<sup>65</sup> Vano, nyuwo munnoona vatthu vankhal'ahu? Okathi wo wiiraana, okathi onoon'ahu itthu iya siiraanaka. Oh, xeeni hiyo ovonyaka woona itthu iyo? Nyuwo pooti—nyuwo pooti oweha mu mwa Yoolempwa ni woona nipuro Owo ohimaly'awe yeeyo, etthu Owo aarow'awe wira. Vano, hiyo ninnoona eyo yiiraneyaka. Hiyo ninnoona mukereja etthu Owo aahimaly'awe wira; hiyo ninnoona yiiraneyaka. Ninnoona ilapo siiraanaka vamosa. Ninnoona ismu siiraanaka vamosa. Ninnoona ikereja siiraanaka vamosa. Ola p'ukathi wo wiiraana. Ewoora yo wiiraana. Eyo ti erooho y'okathi, "Hiyo nihaana wiiraana." Sothene sinihimmwa sihaana otthokhihiwa; hata kuveerunu khonaakhela eyo.

<sup>66</sup> Moosuwela, ntoko nammuttettheni... Nkikhanle ntoko nammuttettheni, ntoko nammuttettheni a Estadu Unidu, nnakhala vo miyo—miyo...nyuwo mwaakivanheru exekeke ya itoolare thanu miyo nkehererya ohela nsina naka vaavo. Hmm. Moone, nkaakhanle wira. Moone, ola okathi wo wiiraana. Yothene eyo ehaana ovira moowiiraanani wa enamuna emosa, nto wiiraana iwo ti etthu ene enruuha ekanyeryo ya nxeni. Munnona? Okathi wo wiiraana, ni enroiha elukamihaka muhina mwa yeeyo. Vanniweryaneya woona ni maitho vookhweya, mwaweha vale. Ola okathi w'otakanxana, vaavo itthu sothene siniiraan'aya vamosa.

<sup>67</sup> aYuta—aYuta yaahiiraana envirikanyaka Yesu, ntoko awaya—ntoko Mesiy'aya. Tivo, hiyo ninnoona etthu yaakhumelenle. Hiyo ninnoona etthu emosaru vano, komunismu airaanaka wira ahonone ekereja, nuumala ekereja wiiraana muhina mwa Mwaataano wa Ikereja Molumwenkuni mothene etthunaka ohonona Mutthaka, Masu a Muluku. Awo anehererya wiihuluxa Yoowo. Etthu emosa paahi akhanly'aya wira olattula muthukumano, okhala wira awo ahiivalaanya; nikhuru naamukhaani va, aMetotista, ni aPatista, ni aLuteraano, ni maPrespiteriyaano, Ekereja ya Kristu, ni sikina siiso. Awo khanwerya wira etthu, 'okhala wira *ola* onoomuvirikanya *ola*, *ola* omuvirikanya *mukina*, mwiixuttiho aya ti woovirikana ntoko siry'aya epantte enikhuma nsuwa ni epantte enkela nsuwa. Moone, awo khanwerya wira. Masi vankhal'aya vamosa, vathi va muru mmosa muulupale, awo anniwerya. Awo anniwerya nto.

<sup>68</sup> Ti siiso aKatolika aris'aya owiiraanaxa, Katolika y'oRooma, vekeekhai awo ari oowiiraana vamosa, awo a...oowaatta ti Katolika y'oRooma; Ekreku ni aKatolika akina kahi—kahi oowaatta ntoko aKatolika a oRooma. Vano awo animwiiraana vamosa, ni mwaha wa yeeyo awo ankh'al'aya vamosa. Hata wira enkhumelela exeenii, paapa ole ti muru wa itthu sothene. Munnona? Ni hata wira mutthu mukina onihimya exeeni, "Owo t'okhanle oohivonya; owo ti—owo ti—owo ti namaranttela a Muluku, ti yeeyo tu; owo t'onimuttharela Muluku; owo ookhalana owerya w'oruma omooroni, Wirimu, ni epurkatooriyu." Munnona? Tivo khiivo etthu ekhanle wiiriwa



mwa mwah'owo; etthu p'itthu enihimy'awe, ti yeeyo erina wiiriwa.

<sup>69</sup> Vano, maPrustante aniipakela muru aya ntoko yoowo, siiso. Vano Bibilia khonihimya wira yaahikhala elatarato yaapakeliwe nxeni? Elatarato exeenii? Eyo etthu emosa yoolattana, yoopakiwa yoolattana. Eyo eri vo, etthu emosaru. Exeeni iyo? Yiiraanaka vamosa, nto eyo ti erooho ya okathi, *wiiraana*.

<sup>70</sup> Wiiraana vamosa vano, weererya ohonona Mutthaka. Awo anhonona sayi Yoowo? Yaarowa owerya sayi ohonona Masu a Muluku? Awo anoowerya okhaliha ookhwela, oohifayi, ekuxaka ilimalelo ntoko siiraly'aya wopaceryani wu, n'ukhaliha Masu a Muluku ohifayi. Moone, awo aniira, "Oh, eyo e... Vekeekhai, tthiri..." Munnimoona muthiyan'ola oohaamini oneerery'awe o...owo...Kooliyala nsina nawe vano; vaakhanle wira kaaniwerya oromola paahi. Owo...kineeserya wuupuwela manceene.

<sup>71</sup> Kimuupuwelaka Muhano Nation ula nihiku nlo; kaanithuna okhumelenleene mukina ntoko yoole. Aari mmosa yoowo aarowaka mpaare n'upwexakasa isuupha sa wiskhi, n'urihelasa mapawe n'itthu sothene siiso. Ohinvenyeryani muthiyana mmosa siiso olelo, n'urwa nno n'ukherasa ilarataro iya s'athiyana ala epwitipwiti a nloko nawe, n'itthu siiso? Eyo, khekhalaniwe-tho eyo.

<sup>72</sup> Vano, masi muthiyan'ola, oohaamini, yoowo aahimnye wira—wira "Bibiia t'ohilikana ni malamulo, omusoma muxikola mw'anamunceene," ni itthu siiso.

<sup>73</sup> Vano awo nave, mooweha-tho, awo aneererya ohimya vano, ni asomi aalupale a Yoolempwa, ahimnye wira "epantte yuulupale s'eprofeta sihimmwe mBibiliani saari soovonyeya voomalela, ni wira khasinaireyeke." Ni nyuwo muhiiwa yeeyo ehimmwaka ni moosoma. Ni awo aneererya ohimya itthu sothene; moone, awo aneererya ohonona efaita ya Masu awo. Awo yaaweryaka ohonona ni oranttelihya Yaawo ni eyaaminelo wala etthu atthu arin'aya, enooneya vamaithoni vaya okhala yooreera ovikana Masu, vano awo anoohonona Awo ni sawaya—n'ilimalelo saya. Ni ti siiso awo aneerery'aya ohonona Masu a Muluku, ni ipoliitika saya sa muromolelo.

<sup>74</sup> Vano, khula ekereja yookhalana ipolitika saya. Ekereja ya Kristu yookhalana, ekereja y'eKristu yookhalana, ni aPatista, n'aMetotista, ni maPrespiteriyaano; sothene iyo sirina ipolitika soovirikana. Vano, awo anoosusa eyo okhala wira ahiivalaanya. Moone, khivaakhanle ookhala siiso khalayi, awo ahaana wira vano. Moone, ola p'ukathi wo wiiraana, nto vano awo othene anihela vamosa ni waatakanxa vamosa atthu othene ni woona etthu enkhum'aya-no. Wulu, eri ntoko woosa ephaawu ya enama ya khavalo, ni ikokhola sa mulaathani,

ni sothene saatakanxaly'aya vamosa; ni okhatta vamosa, omutakanxa kharakha oowuntta vamosa, ni woona etthu enkhuma. Kookupali wira nkinthuna hata emosa. Nnari, mulopwana! Ti siiso awo aniir'aya. Moone, awo anaakuxa atthu anaamini wira Yesu aari ethale, ekereja enaamini wira Yesu aari ethale; ekina, akina anaamini wira Owo aari Profeta.

<sup>75</sup> Mmosa oniira, "Mahiku a miiriya aamala."

<sup>76</sup> Mukina khwira, "Siiso ekhanleene etthu iyo."

<sup>77</sup> Ni sothene iya vamosa; ni Bibilia ohimye wira, "Vanweryaneya sayi anli weetta vamosa ehiiwananaka?" Munnona? Vano, eyo ti enamuna yo wiiraana awo arin'aya. Ni okhalana phaatiri mmosa oowaarya wira emuhele vasulu va yeeyo, nto vo enkhalaniwa elatarato ya nxeni, etthu yeeyo Bibilia onihim'y'awe. Vano awo aakhalana mulaleyi mmosa Luteraano, muru wa yeeyo. Ahe, hiyo ninnoona wira okathi wo wiiraana. Etthu emosaru vano, Komunismu ni othene animwiiraana vamosa; molumwenkuni, ni mukereja ni siiso, animwiiraana vamosa.

<sup>78</sup> Nwehe ephattu. Oh, wulu! Ephattu, mwaweharu ephattu paahi, eniira etthu emosaru. Ephattu ti ekalentaariyu ya ithoonyeryo sa Muluku. Mwaanisuwela yeeyo? Yesu aahimenrye oweha ephattu. Ephareya yaarowa orumaka, moone, ni saarowa okhala itthu soovirikana, ni itetere s'elapo mapuro manceene, ekhotto y'elapo, ithoonyeryo wirimu, ithoonyeryo elapo ya vathi, mapuro othene saamukhala ithoonyeryo sa okathi ula onoorwa.

<sup>79</sup> Nwehe meeku. Meeku ehinatthi omutannya mwanankhaya, moosuwela moota eniriw'aya? Meeku manceene makhaani ankhala vamosa, khupaka neeku nuulupale. Ahe, nla nookhalana ettheke vakhani enruma, nla nikina nookhalana ettheke vakhani enruma, vano othene anruma vamosa, vano onkhuma mutaseke. Munnona? Awo anootakanxana ehinatthi okhalana mwanankhaya; ahaana wira.

<sup>80</sup> Nkawehani marattha ni marattha a mmuro wiiraana ehinatthi ohiya elapo aya. Munnona? Awo animwiiraana. Munimoona awo evavaka okhuma ntthiya nla mpakha ntthiya nle, okhuma va mpakha iwe, othene aya ekhalaka vamosa. Awo animwiiraana, yiilikanyihaka wira evave. Moone, eyo paahi. . . eyo ephattu, ni Muluku opattunxe ephattu, nto ephattu envara muteko ni mutthokiheryo wa Muluku. Nlo nlamulo, nlamulo noohilempwa na Muluku, wira ephattu envara muteko ettharihaka nlamulo Nawe.

<sup>81</sup> Ntoko, kilavulaka vamutekoni w'ovitha, yookhala ephwamwaasi enkhuruwela mukhapurini, vathi va mutathaari wa mwiri, wira ekhale memme mpakha ohihimuwa okathi w'ephovo. Nlo nlamulo na Muluku. Khuuvo osuwela onwerya oroiha ephwamwasi ile vathi vale; khimwaarowa owerya ophutta khimwaarowa owerya owama. Khiivo enamuna yo

wira oratteene ovikana siniir'awe Muluku. Muluku ookhalana enamuna yooloka. Tivo ntaakhuru namora, vano Owo onroiha ephwamwaasi mukhapurini khuvitha. Ntoko Yobi sihimaly'awe, "Mukivithe mukhapurini mpaka oviruwa Wanyu omale." Munnona? Eyo enoorowa vathi vale okhala wira nlo nlamulo na ephattu, ohinatthi okathi wa xeelo. Nkawehani mataakhuru vano opacerya omora. Mwaha wa xeeni? Nlo nlamulo na ephattu.

<sup>82</sup> Marattha anootakanxana, khula nimosa wa yaawo, khimuthukumanela emurukurenryeene muhooleli. Mme awo annisuwela mwa enamuna emosa, nkisuwenle mootta xeeni aniir'aya, masi annisuwela wira nrattha nle naamukhaani noolopwana ti nikhanelle muhooleli. Nto nrattha nle noolopwana, awo othene ankhala vamosa khurukurerya nenlo, khuvanya evavasaka. Nto nlo nno...khinnakhumeke vanthiyani vale vano, masi nlo ninoorowa saana mpakha oLouisiana wala Texas ntoko sinwery'aya, mpakha mmatta mwa musoro. Moone, awo ehinatthi ovenya enavava, wira ehiye ethhoko aya ayariw'aya-wo eyaakha ele, awo animwiiraana vamosa. Amen! Eyo eri vo; anthukumana emurukurenryeene muhooleli aya.

<sup>83</sup> Mulattu ene okhala wira, ni mutthu, owo khommusuwela muhooleli awe. Ayo, mupopwana. Awo anoothukumana erukurenrye muromolelo, awo anoothukumana emurukurenrye pixipu wala mutthu, masi kanrowa omuthukumanela Muhooleli, Eroho Yowarya mwa Masu. Munnona? Awo aniira, "Oh, ahe, kinnoova okhala namathipelela vakhani; kinnoova ohipacerya oratteene." Ohhhh, eyo eri vo! Ankhil nrattha naamukhaani naahimye wira, "Khenkisivela mootta ale ankhapelel'aya mapururu aya. Nkikupanli wira kinimwaatthara." Munooriiriwa mpakha okhwa. Munoovariwa vaavo, mwaahikhume nva—nvavaka ni nikhuru nlo ninrow'aya. Nlo nmimwiiraana, nto ephattu eniira yeeyo.

<sup>84</sup> Marattha a mmuro aniiraana vamosa, animuthukumanela muhooleli aya; awo aniira ethu yeeyo.

<sup>85</sup> Mootoko woona mupattethe w'enwi? Enwi enootakanxana vamosa, ehinatthi okhala mupattethe, emuthukumanenleene pwiyamwene aya. Eyo ekeekhaii. Nto otthu onrow'awe, n'iyu sinrowa weiwo. Ayo! Eniira exeenii? Eyo enimwiiraana ehinatthi mupattethe. Ekeekhai; khula ephattu!

<sup>86</sup> Ihopa sinimwiiraana vamosa sihinatthi weetta mukwaha w'ephovo. Mphareya, sinniphwanyaneya; iye suulupale...iye siniihan'ahu "nakhumwa," salmawu. Okathi sinwel'aya iwe, sihinatthi opacerya weetta, munimoona siry'ene ikonto miloko sene, mphareya, sitepaka othukumana; maasi maakha, masi iyo vekeekhai ihopa sa maasi ooriirya. Nto va iyo sinoorowa siwelelaka maasi ale ooriirya, wira sirowe mwaha w'okathi w'orela mooce. Iyo sinoorowa iwe n'urela mooce, khula iyaakha

xexe, n'ukhwa simalakaruru orela. Ni sinnisuwela wira sinrowa iwe wira sakhwe, ni khimwaakhanle weemexa ni hat'etthu. Iyo sinootupha ixikatta sa ihopa ni itthu sothene sikina, sirowaka iwe, sisuwelaka wira sinrowa okhwa. Masi nlamulo n'ephattu sinniiriha, sisuwelaka wira sinrowa iwe orela mooce vantthiyani n'ukhwa. Nto iye sikhaani sinooyariwa, nto etthu emosa sinimwiiraaniha vamosa nto, vano sinoorowa mphareya. Iwo wiiraana! Nlo nlamulo. Khivanweryaneyaya oxintta nlamulo na Muluku.

<sup>87</sup> Ilapo si—sinookurumuwa, wa okathi vano onoon'ahu wira—wira sihaana wira yeela. Hiyo nneetta nirowelaka evitavitika mulaponi. Hiyo ninnoona wira ilapo sinoomaliha opatthani. Eyaakha t'iyaaakha, hiyo ninniphwanyaya elapo *ela* emiriwaka ni komunismu; *ela* enoomiriwa ni komunismu. Ni muumu mulaponi mwahu muumu, enoonuuliwa ni komunismu, n'uwo onoorowa oxintta! Moone, onoorowa oxintta, khiivo enamuna y'omaliha. Mwaha wa xeeni? Mwa niwoko nimosaru nahaaweriw'aya weemexiwa Tiitu. Atthu aamukhotta Muluku ni Masu Awe. Ayo, mulopwana, tivo awo anoorowa oxintta, ni hiyo ninnoona eyo yiireyaka.

<sup>88</sup> Miyo, voolimaleleya, kinnikuxa iwoora piili; soovira minuutu miloko miraru, naanaano va. Munnona? Masi wira kihile-mo yothene ela, kinimwaakuva. Mwasome mwaphiya owaani.

<sup>89</sup> Nwehe, awo animwiiraana naanaano va. Nyuwo muniira, "Munna Branham, eyo ekeekhaii?" Awo anoorwa okela Mukhottoni y'oHarmaxitoni; vekeekhai yeeyo enrow'aya wira. Munnona? Ni awo animwiiraana mwaha wa yeeyo naanaano va. Tivo hiyo nrin'ahu Nações Unidas ni sothene sirin'ahu. Olumwenku w'Onikela nsuwa onimwiiraana ovirikanyaka Olumwenku w'Onikhuma nsuwa, komunismu ni sikina, sothene sinimwiiraana. Ikereja sinimwiiraana vamosa. Sothene sinkhala ntoko sinimwiiraana. Wiiraana, wiiraana vamosa, hiyo ninnoona eyo.

<sup>90</sup> Nave-tho, okathi wiiraana nno wothene w'elapo, ithoonyeryo iya, ithoonyeryo s'elapo, hiyo sinoon'ahu mu molumwenkuni, itetere mapuro manceene, itthu soohiyana-hiyana siiraanaka; siruuhaka olumwenku vamosa, saaruuhaka atthu vamosa, ikereja sothene vamosa, itthu sothene iya. Nto okathi wiiraana nno wothene oniiraney'aya, wookhala wiiraana mukina oniireya. Amen! Ti yoowo onthun'aka owooniheryani vano.

<sup>91</sup> Muluku onimwiiraaniha Mwaakameliwa Awe. Owo onimwiiraana, okhuma Onikhuma nsuwa ni Onkela nsuwa, ni Onkela epheyo ni Okuusini. Wookhala okathi wo wiiraana, nto owo oniiraneya naanaano va. Owo oniiraanihela exeeni? Okuxiwa. Amen! Muluku onoomulikanyiha Yoowo. Ayo

mulopwana, omutakanxa! Owo ontakanxana ni exeeni? Ni Masu! “Maana erimu yothene n’ilapo ya vathi sinoomala, masi Masu Aka khammala.” Owo onimwiiraana Mmansawe ni SIISO ANIHIMYA T’APWIYA voohiya etthu p’itthu muromolelo wala mutthu onihimy’awe. Owo onimwiiraana Mmansawe. Owo onimwiilikanyiha. Mwaha wa xeeni? Owo ti Mwaakameliwa. Ti yeeyo. Ni Owo onimwiiraana Mmansawe ni Mutheli Awe, moone, nto Mutheli ti Masu. “Wopaceryani naari Nsu, Nsu naari ni Muluku, nave Nsu naari Muluku. Vano Nsu naahiipaka erutthu khukhala ni hiyo.”

<sup>92</sup> Vano Ekereja ni Mwaakameliwa ni Masu sinkhala mmosaru, mpakha Masu Aneene anvar’aya miteko sa Mutheli. Amen! Munnoona yeeyo? Wiiraana! Kahi-tho, “Mwiitakaxhe mukereja”; kahi-tho *ela*, masi otthyawa itthu sothene khuphitaana ni Yesu Kristu. Munnona? Ola okathi wo wiiraana. Muluku, omwiiraanihakha Mwaakameliwa Awe vamosa, omuhokoloxaka Yoowo; voolikana. Iraanihakha Masu a natiri Awe.

<sup>93</sup> aTesalonika Anenli, kapiitulu 2; Anihimya wira, ekapiitulu 5 ila enihimya, “Atthu ooreera murima anrupa vatthayani elapo ya vathi anoovenya. Vano nto ninrowa otakanxana ni yaawo (ale akumi, n’ale akhwiiye), anootakanxana hata nihinatthi ophiya osulu Iwe,” ’okhala wira Mwaakameliwa onrowa okhala oomalela okathi oniphiy’awe Iwe. Ale ari akumi, aniiraana ni Masu, n’ale aronwe yiirale siiso; nto yothene Eyo enootakanxana, khupaka wiiraana wuulupale wo wiiraana ehinatthi owela Iwe. Amen!

<sup>94</sup> Komunismu ohaana ovenya, itthu iya sikina sihaana ovenya, ni ekereja ehaana wiiraana epantte ele, okathi iye. . .ni ilapo wa Mwaataano wa Ikereja sa Molumwenkuni mothene; ni Mwaakameliwa ohaana wiiraana Mmansawe vathi va Masu a Muluku. Wira aire yeeyo, Muluku ooveleliha ethoonyeryo ya Wirimu n’itthu siiso, sinooniherya Ekereja, ntoko Owo siireny’awe elapo. Amen.

<sup>95</sup> Muluku; okathi wo wiiraana! Ayo, mulopwana. Oh, wulu! Vano, muupuwele, vano, wookhala wiraana wa Masu (otthikela wiiraana), oholoxaka “Waamini waavahiwe mahiku othene ale ooreera murima.” Ohokoloxa! Wira eyo yaarowa wiiraneya nihiku nla paahi. Okathi mmosa paahi yaakhanly’aya wiiraneyaka naanaano va. Khenatupheliweke nipuro nikina; awo arookhuma khukela mmairani a ithiru a miromolelo. Masi vano, kahi mpantta wa hata niira na ithiru na muromolelo, okhala wira ola okathi wo wiiraana w’alopwana n’athiyana a khula nloko, khula nikhuli, khula eyaaminelo, itthu sothene vathi va Kristu ni Opatiiso wa Eroho Yowarya ni otthikela Masu.

<sup>96</sup> Okathi wo wiiraana wa Ekereja! Oh, wulu! Otakanxa Masu othene yaamwaramwariwe mapuro othene ni mitthenkeso iya: okhuma oNicea, oRooma, okathi awo atthokihaly'aya ekereja yoopacerya, ni khimutthokiha Lutero, khimutthokiha Wesley, khutthokiha ikereja sothene sikina. Nto ni wira siiso, yaahaana okhaliha eyaaminelo, vano nto Muluku n'uveleeliha etthu ekina, awo khuhiwerya waakhela Yeeyo. Tivo, khivaweryaneieye mpakha va. Ni Muluku oolaiherya, mahiku ookiserya, wira "Waamini w'axitiithi aamuhokoloxeriwa Mwaakameliwa emaara ekina," wira yaarowa okhala siisa, ni khiyaakhanle ookhalaka okathi mukina masi okathi yoola. Nkawehani ethoonyeryo xeeni ya Wirimu, ntoko Nlumi na Mooro niri vasulu eriyari ahu, vano ni ithoonyeryo ni mitikiniho s'Apwiya Yesu Kristu. Nto Awo yaalavulaka ni hiyo, Nlo khaninvonya okhala vantthuneya. Amen! Vano hiyo ninnoona vamphwanyaney'ahu. Okathi wo wiiraana.

<sup>97</sup> Hiyo ninnoona ilapo siiraanaka, ninnoona olumwenku wiiraanaka, ninnimoona komunismu airaanaka, ninnoona ikereja siiraanaka; ni ninnimoona Muluku airaanaka Mmansawe ni Mwaakameliwa Awe mpakha Owo ni Ekereja okhala etthu emosaru. Aleluya! Ntoko epiraamite vale. Khweeli! Yiiraanaka vamosa; Muluku airaanihaka! Mwaha wa xeeni? Khenatoko khalayi, okhuma okathi woopacerya wa ekereja, naari Nlumi na Mooro eriyari y'atthu. Khenatoko khalayi, okhuma okathi woopacerya wa ekereja, awo khanatoko woona itthu sinoon'ahu olelo. N'ila eweryaneieye paahi okathi Muluku oveleelinh'awe Ikanyeryo Thanu na Pili khunivaha ethoonyeryo ni Yeeyo, khuveleeliha Malaikha mathanu na manli vathi okhuma Wirimu; khurwa khuhokoloxa Masu yaale yaamwaramwareieye mmuromoleloni mme, nto khulutta yeeyo ethhikelaka mwa Masu a Muluku, wira oruuhe Eroho Yowarya Awe.

<sup>98</sup> Yesu ohimnye wira, "Nyuwo mwakhala mwa Miyo nave Masu Aka mwa nyuwo, vano nvekeleke sothene sintthun'anyu, munimwiireliwa." Otthikela omwiiraaniha Mwaakameliwa ni Masu, yaawo okhanle Muluku. Ekereja ni Masu, kahi Ekereja ni eyaaminelo, Ekereja ni Masu; Mwaakameliwa ni Masu ahiiraana vamosa. Oh, wulu! Exeeni...Ohokoloxa exeeni? Waamini w'axitiithi oopacerya a pentekosite, moone, waamwaramwariwe nnikhuru na Lutero. Kahi Lutero mwaneene; kahi Lutero, kahi Wesley, kahi anamapacerya ale aalupale. Masi vamanly'aya orowasa, yaahikhala ekereja yaakhumelenle, nto awo...awo yiirale exeeni ni yeeyo nto, awo apanke mutthenkeso wa yeeyo. Awo arookupali iyaaminelo ni sikina, khurowa. Nto nkaaweheni olelo, vano awo aakela Mmwaatanoni mme wa Ikereja sa Molumwenkuni mothene.

<sup>99</sup> Vano, moone, masi mahiku ookiserya, moone, hiyo ninnoona itthu sikhumelelaka vano sahaatonko okhumelela khalayi. Moone, eyo ethoonyeryo ya Muluku, ni wiiraana nno wothene ti

ethoonyeryo y'okathi. Vano, nintthuna niwehe yeeyo voorattavo ni nikupali saana wira ninniwa saana. Ehiyaka . . . awo anoohiya Masu eekeekhai mwaha wa miromolelo; wira ekupali eyaaminelo ni miyuupuwelo sa atthu oohiyana-hiyana ohiya okuxa Masu.

<sup>100</sup> Wiisuupulula 10 oohimya, “Mutthaka wa nlaikha na neethanu nenli.” Vano muupuwele, eyo ti va Malope Mathanu na manli pahi, ni aakhala malaikha mathanu na manli anoopa Malope Mathanu na manli. Ti yeeyo enkelel'ahu ohoolo. Masi muupuwele vatthu, vanceenexa Eyo ehimaly'aya, “Na nlaikha . . .” kahi Nlope na nlaikha na neethanu nenli, masi “Mutthaka wa nlaikha na neethanu nenli.” Moone, kahi nlaikha na Nlope, nlaikha na Mutthaka! Moone, nlaikha noopale nlope paahi, nlaikha nle na neethanu nenli, nlaikha na Nlope. Masi ela enihimya wira, “Mahiku a Mutthaka wa nlaikha na neethanu nenli,” moone, okathi Mutthaka aya ommaliheriw'aya. Moone, owo Mutthaka wa okathi wa ekereja. Mwa okathi yoola, nto nlo naa . . . Mutthaka, kahi Nlope, nto “mwiiriirya wa Muluku (olempwe muhina mwa Masu) waamurowa omaliheriwa.”

<sup>101</sup> Vano nkawehani nihiku xeeni ninkhal'ahu! Nkawehani Ikanyeryo iya, moota eyo eruuhaly'aya Masu a Muluku ale yaamwaramwareiye, ale Lutero n'akina aya, ale anamarehererya ale aalupale yaakhumelenle; ethhikaly'aya khooniherya eyo mBibiliani, vaavo awo yaarow'aya okhala; khula mutthu voopuroni vawe saana, etthu aarow'awe wira ni etthu yaarowa okhumelela ekereja; etthu owo aarow'awe wira, ni etthu yaarowa okhumelela ekereja; itthu iya sothene owo aahiyaly'awe. Vano nto, nihiku nookiserya, okathi wahaasuwel'ahu hat'etthu ya yeeyo, khunileela khalayi ene etthu emosa yiiraneyaka; ni hata ixornaale n'itthu soovara yeeyo, ni enookhuruwa ni wuupulula n'ulutta miiriirya vamosa. Amen! Munna, eyo ti yuulupalexwa wa miyo! Eyo, wa miyo, ennilakiherya Masu. Amen! Nkincala etthu—etthu, wala, kinnicala etthu atthu anihimya'aya, anuupuwel'aya, ti yeeyo, masi wa miyo eyo ti Ekeekhai.

<sup>102</sup> Ntoko asuweli, erwasaka okhuma oPapilooniya, awo yaahikhuwelasa, “Ori vayi Ole, oyariwe Mwene a aYuta? Owo ori elapo ya vathi, naanaano va. Hiyo nihaana omuphwanya.” Ti yeeyo. Ni kinnaamini wira Owo ohanle vakhani orwa vanwery'aka wira, “Mmoone, Mutheli oophiya! Kinniwa okhuwela w'ohiyu eriyari!” Amen! Hiyo nri woomalelani wene w'okathi. Oh, wulu, okathi onkhal'ahu. Nwehe. Munnona?

<sup>103</sup> Nihiku xeeni! Okathi xeeni onkhal'ahu, mwiiriirya ola muulupale wa Muluku onimaleriwa; onruuha oMuluku, wooniheryaka exeeni Iyo; moota ismu iya sikhaani, ni sikhumaly'aya khimukhaliha Owo *ela*, nto mutthu mukina khimukhaliha Owo *ela*, nto mutthu mukina khimukhaliha Owo *ele*. Masi Nlaikha n'Apwiya nookhuruwa khooniherya ismu saya sothene, khukuxa Ekeekhai ile ya yeeyo, khooniherya Yeeyo.

Nto Eyo eri vo, voolokaxa ntoko enweryaney'aya okhala, khiivo enamuna ekina vaakhanly'aya oroiwaka. Eyo eri vo, ti yeeyo Owo okhanly'awe. Moone, epyo y'enowa, sothene—itthu iya sothene soohiyana-hiyana saari sootikinihaxa eriyari y'atthu. Munnona? Exeeni iyo? Owo aarina. . . Ela ethoonyeryo ya xeeni? Wiiraana!

<sup>104</sup> Owo ohimye exeeni mwa Malakhiya 4? Aamuhokoloxerya! Ohokoloxerya Waamini woopacerya wa pentekosite, waatthikela atthu arina Mutthaka mmosaru wa pentekosite, ethoonyeryo emosaru ya pentekosite, mooniheryo mmosaru wa pentekosite, Muluku mmosaru, Owerya omosaru, mwiixuttiho mmosaru, sothene voolikaneene, ni olipiheriwa wa Nlumi na Mooro nenlo nammoronxe Saulo mphironi, arowaka oTamasiku nri eriyari ahu olelo, niiraka itthu imosaru Owo iiraly'awe nihiku nle. Wiiraaniha!

<sup>105</sup> Hiyo ninnoona ilapo siiraanaka, ninnoona olumwenku wiiraanaka, ninnoona ikereja siiraanaka. Ninnimoona Mwaakameliwa airaanaka, airaanaka ni Masu. Mwaha wa xeeni? Masu ti Muluku. Nto okhala wira Masu. . . Okhala wira Mutheli (ory'ene Masu) ni Mwaakameliwa (ory'ene namwiiwa Masu), Awo anoowra vamosa mwa Wiiraana. Awo anoophitaana ntoko othelana. Moone, Awo animwiilikanyiherya othelana, ni Awo—Awo ankhala Mmosaru. Masu ankhala nyuwo, nyuwo munkhala Masu. Yesu oohimya, “Nihiku nenlo munoosuwela ela. Sothene Atithi akhanly'aya, Miyo ka yeeyo; ni sothene Miyo kikhany'aka, nyuwo mwa yeeyo; ni sothene nyuwo mukhanly'anyu, Miyo ka yeeyo. Nihiku nenlo munoosuwela wira Miyo kiri mw'Atithi, Atithi mwa Miyo, Miyo mwa nyuwo, ni nyuwo mwa Miyo.” Munnona? “Nihiku nenlo.” Nihiku xeeni? Nihiku nla! Hiyo ninniphanya miiriya suulupale sa Muluku suupululiwaka. Oh, moota enkisivel'aya yeeyo!

<sup>106</sup> Oh, nkawehani moota siyensiya ni Masu yahaawery'aya wiiwanana, ntoko aniir'aya olelo. Awo khayaawerya wira yeeyo khalayi. Ti naanaano va paahi yaakhanly'aya wira.

<sup>107</sup> Nwehe, Owo ohimye wira, “ithoonyeryo sa wirimu, ithoonyeryo sa wirimu.” Siyensiya, ni ithoonyeryo sa mulaponi; vano awo aakhalana ithoonyeryo suulupale osulu olelo, awo aakhalana mastronauta ni itthu sothene. Masi exeeni mastronauta ala aniirel'aya olumwenku, ethoonyero? Enaaruhela woova. Awo khansuwela okathi xeeni yaakhanly'aya oroihaka osulu etthu siiso n'umoroxa misika iya paahi, nto khanaarowa okhala-tho. Munnona? Vano iyo ti ithoonyeryo awo arin'aya, itthu soowooiha wirimu. Munnona? Awo aakhalana seiyo, misika s'atomu ni itthu sothene, inamuna sothene sa ithoonyeryo.

<sup>108</sup> Nyuwo muhona wira awo aalepa mwi—mwiiwanano ola, nihiku nle, wira khiyaarowa-tho orumiha misika



vanlakani, masi vano anoorowa vathi va maasi ni vathi v'etthaya, yeehereryaka vamosaru. Munnona? Awo anoolepa mwiiwanano, "Hiyo khanniira ela, mwahimya-ru wira khamuniira (masi ninootthikela owaani naire sa; nisuwelaka wira nyuwo muniira siiso iwo)." Munnona? Khav'etthu tu, eyo paahi...khuuvo okupalina yaaworu, khiivo—khiivo hat'etthu. Vanniweryaneya...Munnona? Ni othene annimoova mukina. Eyo ethoonyeryo yootutuxa.

<sup>109</sup> Siyensiya ni mutthu ni ilapo soopaka ethoonyeryo yootutuxa osulu. Ti yeeyo. Vano, annoovana mmosa ni mukhw'awe. Ni yaahikhala ethoonyeryo ya wirimu yaavaheriwe e...Nkoonani vano, awo aakhalana ethoonyeryo wirimu nave, ethoonyeryo yootutuxa, mutthu ntoko astronauta; pooti okhalana musika w'atomu, nto vaamuweryaneya omoroxa kuhonona elapo yothene. Omuroiha ntoko astronauta, kuhala weiwe. Khiivo hat'etthu enaakhotiha wira yeeyo. Vekeekhai awo anniwerya wira yeeyo, awo...khula okathi awo antthunas'aya. Awo anoowerya okhalaha ntthupi yatthuna vale, masi...muhina mwa minuutu muloko ni mithanu okhuma naanaano va. Vano ele onwerya wira mmosa, mukina onniwerya siiso, nave. Tivo, ennooneya wira aakhalanasa ethoonyeryo, masi enamuna eyo y'ethoonyeryo ennaakhalaha ootuthuwa.

<sup>110</sup> Awo animwiiraana, ehelelaka ikuru saya vamosa. Olumwenku wootaphuwa, awo antakanxa ikuru saya. Komunismu antakanxa ikuru saya ni Ruusiya. Atthu othene; masi khula mmosa onnimoova mukhw'awe. Moone, eyo ethoonyeryo yootutuxa. Ti yeeyo. Iyo ithoonyeryo sa mulaponi, ni itthu siiso.

<sup>111</sup> Masi Ekereja ehaakhela Ethoonyeryo ya Wirimu: Astronauta! Amen! Yesu Kristu, mwa mukhalelo wa Nlumi na Mooro; mwa yeeyo Owo aary'awe Waataana Wa Khalayi, yeeyo Owo aary'awe okathi aakumann'awe ni Saulo iwe arowaka oTamasiku, Yesu mmosaru yoowo va olelo! Nto Nlo nniira exeeni? Nlo ninruuha woova? Nlo ninruuha ophenta, wiiraana mmosa ni mukhw'awe. Amen! Woonelana othunku mmosa ni mukhw'awe. Nlo ninruuha Ophenta wa Muluku, oh, eniiraanihaka ni enniruuhelela, Erutthu ya Kristu, mwa omosa ntoko Mwaakameliwa. Ti yeeyo nniir'aya vano, wiiraana nno wuulupale Muluku... .

<sup>112</sup> Awo animwiiraana, nikhuru nimosa *nno* wira niwanane nikina, nikhuru nimosa *nno* wira niwanane nikina. Va eniphwanyaneya ekereja eriyari aya; nwehe etthu enkhumelela, eyo enimwiiraana n'awo. Ti yeeyo vekeekhai. Masi, vano, ninnoona wira enruuha woova ni othepewa.

<sup>113</sup> Masi Ekereja, Mwaakameliwa, eniiraana mwa Muluku mmosa, mwa Eroho emosa, Eroho ya Muluku, mwa Wiiraana omosa woowaarya wa Muluku, wira okhale Mwaakameliwa

mmosa oowaarya a Muluku. Ti yeeyo, othene vamosa, wiiraana w'Erutthu. Erutthu elipelelaka ntoko Mwaakameliwa; ntoko—ntoko ekhanly'aya Mwaakameliwa, ntoko siniisiihan'ahu Mwaakameliwa. Wa okathi wo wiiraana wa Mwaakameliwa, Ekereja enkhalaxa vamosa. Eyo yaahaana oruuha ophentana eriyari ahu, vahaarow'ahu owerya orakamelana mmosa ni mukhw'awe. Ti yeeyo. Okathi nyuwo, khamurina waavara metto atthu wira elompe, khamurina waavara metto wira emukokhorele Muluku, khamurina waavara metto wira yiireke eri yooreera. Awo ari oophentana ni Yoowo, mpakha vahikhanly'aya hat'etthu ekina.

<sup>114</sup> Munimuupuwelela exeeni mwaaruusi, mwaaruusi ooreera saana, onrowa otheliwa ni mmiravo mmosa ooreera ohireery'awe osiveliwa v'elolo-vo ni yoowo, enihimya vanceene wa yoowo ovikana ekumi awe, ni oosuwela wira anoothelanasa vahilekenle? Naattamelaka nihiku nle noothelana, mwaaruusi uwo, kinimooleelani, owo othene onkhala "ootthunexa." Munnona? Owo onoolikanyihya sothene; owo oniivahererya wa yoowo voomalela. Ti yeeyo. Sothene sinimusiveliha mulopwan'owo, ti yeeyo owo onthun'awe wira. Ahe, eyo yaahaana okhala enamuna ya Ekereja olelo, wira makhalelo ahu yaahaana osukiwa saana mwa Muluku vamosa ni Kristu, ootthitiwa memmo ni Eroho Yowarya.

<sup>115</sup> Etthu eniwiixuttih'akani va, ennoohimeeryani sa ithoonyeryo iya ni itthu soohiyana-hiyana siniiraneya, nkirina okathi wo wira yeeyo vano; kinimwiira mutthaka mukina, Apwiya yatthuna vale. Masi yookhala etthu emosa yaamukhaani enihaleela Mukereja. Ni hiyo nintthuna yeeyo, ophiyerya yeeyo, ni nkireere waattamela yeeyo vano. Munnona? Nintthuna niphiyerye yeeyo, vakhala . . . ehaana wiiriwa yeeyo. Mwaahiire, ti yeeyo tu, muhaana wira. Vano nkawehani, okathi wo wiiraana ori vakhiviru, tthiri Muluku ontakanxa Ekereja vamosa wira okhale o—Okuxiwa wira erowe woothelanani wa Wiiraana Wuulupale: okathi Muluku ni mutthu anrow'aya otakanxana wa Ohimala, okathi soopattuxiwa s'okathi sinrow'aya otakanxana ni Ohimala.

<sup>116</sup> Yaahitoko wiiriwa emaara emosa mwa mukhalelo wa Mwaana a mutthu elapo ya vathi. Ni Owo ahaana ovaha Ekumi Awe wira okumiherye owerya, wira awiiraanihe atthu akina ni Owerya wenno, wi ekhale Mwaakameliwa a Yesu Kristu. Nto vano Ekereja enimwiiraana ni Erutthu ya Kristu. Eyo ehiitaphula, yoothikila khula nikwicili naamukhaani, yiilikanyihaka Mmansaya; ekhalaka vamosa, wiiraana yaaworu; oh, ophenta n'uhakalala, nto Eroho Yowarya yeettaka eriyari aya. Oh, wulu, okathi xeeni!

<sup>117</sup> Ntoko sinoon'ahu marattha yiilikanyihaka, ninnoona marattha a mmuro yiilikanyihaka, ninnoona nxeni . . . enwi yiilikanyihaka, ninnoona meeku yiilikanyihaka wira

erupe epula, ninnoona itthu sothene; moota siniiraan'aya vamosa, wa ekakhelo aya yuulupale. Ninnoona Mwaataano wa Ilapo, ilapo vamosa, siiraanaka muhina wa komunismu. Ninnoona siiraanaka nno Molumwenkuni w'Onikela nsuwa. Ninnoona ekereja yiiraanaka vamosa, sothene iya sikina. Tivo ti voohiweryaneya mara, khuuvo hata okathi mukina yaakhanly'aya okhalaka siisa; khiyaakhanle okhalaka siisa iyaakha miloko miili sivinre, khiyaakhanle okhalaka siisa. Khiyaakhanle okhalaka siisa iyaakha muloko sivinre, ehaana okhala naanaano va. Moone, okhala wira ismu iya ni itthu khisaaphiyenrye nipuro nla.

118 Vano nvenye! Mwiitathe, voowaakuva, nto nwehe va vary'ahu! Nri vayi hiyo? Ntoko asuweli ale, hiyo nri oolikana oratteene ni Masu Awe, ni Muthuko w'Apwiya onnaarya mphironi mwahu. Atoottopeliwe Muluku Wirimu. Ni attottopeliwe Muluku Yoowo onivahale Yesu Kristu, Yoowo onimphent'ahu, ni oniruuhale mpakha nipuro nla. Ni ntoko hiyo...Hiyo n'atthu Awe, oothummwa n'esisapo y'Ephome Awe.

119 Oh, wulu! Okathi wo wiiraana warwa vale, hiyo nnooweha, okathi oniiraan'ahu mmosa ni mukhw'awe munluttenti mwa Eroho Awe, hiyo...Enooweryaneya okhala Eroho Awe? Vekeekhai, Eyo Eroho Awe. Ekhalenleni Yeeyo? Awo Masu Awe, ni Owo o...eyo Eroho ya Masu. Nto Eroho ele ya Natiri yarwa wa nyuwo n'ulipiherya ni wiisooniherya Mmansaya vaava va, Eyo Eroho emosaru? Ti Yeeyo emosaru yaari ni Moise mothakoni! Ti Yeeyo emosaru yaari vasulu va Yesu Kristu! Ti Yoowo Mmosaru aakumanne ni Saulo arowaka o'Tamasiku! Owo mmosaru nsana, olelo, ni mahiku othene! Ni Owo onniira ethu emosaru!

120 Ni ninnoona ilapo vamosa, ninoona miru sa ikereja vamosa, ninnimoona komunismu vamosa, ninnoona ismu siiraanaka, ninnoona itthu sothene iya; nto vano ninnimoona Mwaakameliwa airaanaka ni Masu. Oh, wulu! Ola okathi masantu anveny'aya wira atakanxane n'ale ari akumi, wira erowe yatakanxane ni Yesu Kristu wa Ohimala.

121 Muluku anikhaliherye, khula mmosa, wira niiraane ni Kristu ohiy'ula, wira nivahererye sothene sikhany'ahu, sothene sirin'ahu, munepa ahu wothene, erutthu, muupuwelo, wa Yesu Kristu, ni niwehererye okathi yoowo wo wiiraana.

Naruma-ru nlope na Muluku, ni ohinrow'aya  
okhala-tho okathi,  
Ni voosiisu oxe Voohimala, woowaarya ni  
wooreera;  
Okathi ale akhwiye mwa Kristu anrow'aya  
ohihimuwa ethukumane epante ekina

iwe (ni Mwaakameliwa ori mukumi), wira ekuxiwe vamosa.

<sup>122</sup> Nkawehani wiiraana! Muluku oniiraaniha Ekereja ni Masu Awe, Masu ni Ekereja, wira soopiili sikhale emosa, “Muhimye *ela*, enimwiiraneya. Mwiire *ela*, enimwiiraneya. Ti yeeyo; ti Miyo ohoolo wanyu, ti Miyo kinooniherya; ti Miyo ni nyuwo.” Vaareera.

<sup>123</sup> Ninnoona wira vano onoophiya okathi Nlope ninrum’aya, nto atthu ale ooreera murima arumpe ottuli wu, awo khanreerihwa voomalela hiyo nihikhanle; awo anlipa ni hiyo (aHeperi 11); nto vankhal’aya vamosa, awo anootakanxana n’ale ari akumi. Ekereja yiiraanaka ni Masu, nto Ekereja ni Masu yiiraanaka vamosa, ekhalaka emosaru. Atthu ooreera murima akhwiye n’ale ooreera murima akumi etakanxanaka wira ekhale mmosaru; nto othene erowaka vamosa wira etakanxane ni Kristu wu, wa Niira n’Othela na Mwaapwittipwitthi.

<sup>124</sup> Ola okathi wo wiiraana, nto ithoonyeryo sinoovava mapuro othene. Ithoonyeryo siri mulaponi, ithoonyeryo siri muhina mwa komunismu, ithoonyeryo muhina w’Olumwenku Onikela nsuwa, ithoonyeryo muhina mwa Mwaataano wa Ikereja. Nto Ethoonyeryo eri vaava ohiy’ula vathi va elopolelo ya Eroho Yowarya, ni Masu a Muluku elipiheryaka ni ekhalihaka Ekeekhai. Amen! Okathi wo wiiraana! Ethoonyeryo y’Okathi wo Wiiraana!

Nrowe nuurame miru sahu.

<sup>125</sup> Pwiya Yesu, okathi murim’aka woohaawa ontthimak’aya mwaha w’otthapa, koonaka oweryaneya wa miyo, mutthu a eyinnuwelo y’eriyari, masi nlelo, oweryaneya wa miyo owoonani Nyuwo murwaaka nloko nenla; okhala mukumi ni okhala vaava, woona Nlope nlo nirumaka, “Ole ootakhala, eetteleke otakhala wawe nlelo. Naxariya, eetteleke exariya nlelo. Ole ooreera murima, areereke murima nlelo.” O Pwiya Muluku!

<sup>126</sup> Ni wiisuupuwela hiyo neemenle, mwa okathi, wo waaphila niitho, okathi olumwenku ohinrow’aya osuwela etthu eniiraneya, masi naanaanoru, munrowa woona orwa ohoolo wanyu, ale oophentiwa anyu aronwe, orwa otakanxana-tho ni nyuwo. Nto ninrowa otatuxiwa naanaanoru, waaphila wa niitho; nikuxiwe vamosa, wira nakumane n’Apwiya musulu. Vano nto natakanxane ni Yaawo, wira nikhale weiwe mahiku othene, ni ohikhalakhala-tho nikhumaka Ohoolo Waya.

<sup>127</sup> Etthu xeeni yuulupale olelo, Pwiya, osuwela wira vano hiyo nootakanxana ni Eroho emosa. Eroho Emosa, Eroho Yowarya, yookhalana Masu mw’elamulelo aya, enrwa mwa hiyo. Ni etthu xeeni yuulupale, oreeriwa xeeni wiivalaanyiha olumwenku wothene, wira niiraane ni Yesu Kristu. Ni wuupuwela wira nihiku nimosa, mwa mukhalelo w’erutthu, ni erutthu ntoko erutthu Awe Yoowo yoovuwa, ninoorowa okilaathi vameesa

Oniirani n'Othela nto weiwo otakanxiwa waakameliwa wo otheliwa ni Yoowo; wira nikhaleke ntoko Mwaakameliwa ni Mutheli mwa okathi wothene onoorwa, mwa Ohimala onipwaherya.

<sup>128</sup> Pwiya Muluku, ola ohikhale muupuwelo w'ethale paahi w'atthu, masi okhale ekeekhai mpakha etala ni ntthona sikele mw'atthu mpakha awo o...esomaka ixornaale saya, ewehaka vasulu...emwiwaka raatiyu ni ihapari, ni yoonaka wira ola okathi wo wiiraana. Ithoonyeryo sinimwaaphila.

<sup>129</sup> Pwiya Muluku, ntoko sihimaly'ahu sa athiyana, etthu yaarow'aya wira mahiku ookiserya; etthu ekereja yaarow'aya wira mahiku ookiserya; ni etthu yaarowa okhala Okathi wa Ekereja, ni etthu yaarowa okhala Ikanyeryo, itthu iya sothene sikina. Ni ninnoona ntoko saary'aya, mahiku a Nowe. Hiyo ninnoona ntoko saary'aya, mahiku a oSotoma ni Lothi, okathi Nlaikha na Muluku niisuwelinh'aya Nneene mw'erutthuni ya mutthu, nenlo naakhuurale enama y'enyompe khiwurya eleethi ya enyompe, khikhuura mukatthe; khweemela vale ni naaniwerya ohimya etthu yiiraneya ottuli Waya. Vano Yesu ohimye wira etthu emosaru yeeyo enimwiiraneya okathi w'orwa wa Mwaana a Mutthu.

<sup>130</sup> Pwiya Muluku, hiyo nihoona epiraamite, moota nitekaly'ahu vale, ni woona moota nincerenry'ahu itthu iya mwa yeeyo; ni ninnoona wira niri okathi wa wokiseryani, nilipelelaka Nluku Nuulupale noolipiha. Avuwihawe Muluku! Hiyo ninnivekela, Tithi, wira Nyuwo mwaavenxe atthu, voowaakuveya vano, ni munithukumanye vamosa, ni mphento w'ereerelo murima ni omuttittimiha Yesu Kristu ni mmosa ni mukhw'awe.

<sup>131</sup> Yaakhanleene amosa-amosa va ohiy'ula ahirina nrromelo yoowo wiitthyuwaka mwa nyuwo, munnitthuna onvenxerya ntata Muluku wira, "Pwiya Muluku, mukiiraanihe ni Nyuwo, mukiiraanihe ni Nyuwo"? Muluku ooreeriheni, munna. Muluku ooreeriheni, ni nyuwo, nyuwo; ayo. "Mukiiraanihe ni Nyuwo, Pwiya." Ayo! Oh, wulu!

Maloko anoophweeyasa, Isarayeli onoovenya,

<sup>132</sup> Nkanweheni Isarayeli iwe, oowiiraana. Isarayeli, onoorwa akhumaka olumwenku wothene, ohoorwa wira airaane; wira yiiraane nto vano awo aakhala nloko. Awo nloko no wiiraana: ni epanter'aya yawaya, musurukhu aya, anakhotto aya, sothene; yaatonko ene okhala, awo aakhala vano. Isarayeli ohiiraana, Rooma ohiiraana, ekereja ehiiraana. Ni Mwaakameliwa onimwiiraana, amen; ni orwa iwo wo Wiiraana Wuulupale. Exeeni iyo? Sothene sinaattamela Ethoonyeryo yeeyo, Ethoonyeryo yuulupale ni ileetera suulupale, Yesu ni Mwaakameliwa Awe yiiraanaka ntoko mmosa.

<sup>133</sup> Muluku Tithi, munivahe iparakha iya kinaavekelel'aka atthu ala, ni wira hiyo niiraane ni Nyuwo mwa murima ni erooho,

awo avenxaleene matat'aya, etthunaka yeeyo. Pwiya Muluku, munireerihe ni munikhalihe Awinyu; munivahe, Pwiya. Ti yeeyo tu ensuwel'ahu ni enwery'ahu wira, ovekaa. Vano nto Nyuwo moohimya wira naveka vale khwaamini, nnimwaakhela; kinniwehererya yeeyo, Pwiya. Miyo kinnooxukhuruni Nyuwo mwa Nsina na Yesu Kristu. Amen.

Miyo kinnimpenta Yoowo,  
Okhala wira Owo t'opacenyre okiphenta,  
Nto oothuma woopowa waka  
Vamwirini w'oKalvario. (Amen. Oh, wulu!)

Mmoone, Mutheli oophiya!  
Kinniiwa okhuwela w'ohiyu eriyari!  
Ninoowela ninyakulaka, nakhalaru oolipa,  
Nto ninookumana ni Yoowo osulu.

Nwehaweheke ni mulompeke, munn'aka,  
Wira ohikhale onkuxa nleha nanyu,  
Tthiri ole ookuttihiwa ni oohiya waamini  
Khanrowa owara ekuwo ya wootheliwani.

<sup>134</sup> Ti yeeyo. Nrowe niilikanyiherye okhuwela nno w'ohiyu eriyari. Onrowa orwa okathi muhinuupuwelel'anyu. Onookhala okhuwelela, kahi eriyari y'olumwenku ohinaamini; enrowa okhala esiiri. Masi ale anaamini, ale anlipelela yeela: Munnoona ittheneeri sithataanaka? Munnona? Ekumihenrye exeeni? Vekeekhai ntoko yiiraly'aya ekwaha yoopacerya. Moone, hiyo nri va, ithoonyeryo sinimoorwa.

Ninnoona ithoonyeryo s'Orwa Wawe  
wooreerihiwa,  
Moone, mataakhuru a efiku anooripelela vano;  
Ehapari yooreera y'Omwene yoorowa ilapo  
sothene;  
Ni hiyo nri vakhiviru, emalelo ennooneya.

Vano, n'utthapa, ninoorowa olaleerya  
Mutthaka w'orwa Wawe wooreerihiwa,

<sup>135</sup> Eyo ekeekhai? Oh, mulaleerye Mutthaka w'orwa Wawe wooreerihiwa! Ti yeeyo erin'ahu wira. Mwaaleele atthu othene, "Mwiilikanyihe, mwiitthokihe wira mwakumane ni Muluku." Amen! Miyo kinnimpenta Yoowo. Oh, moota onimphent'aka Yoowo. Vano, nrowe neemele vano. Nikhomasanaka mmosa ni mukhw'awe, mookole moonoo muvahane mukhono ni mutthu, mwiire:

Mpakha nikumane! (Nvahane mukhono,  
vano.) . . .mpakha nikumane!  
Mpakha nikumane munawoni wa Yesu;  
Mpakha ni . . .

Muupuwele, nyuwo pooti wiihaniwa. Okumana wahu ontharelana pooti okhala munawoni Wawe.

Oh, Muluku akhale ni nyuwo mpakha  
nikumane-tho!

<sup>136</sup> Vano, muupuwele paahi, nihinatthi okamuna-tho; nihinatthi okumana Ttiminku voosisu, wala Namararu ohiyu, pooti okhala wira. . . naanaanoru, onakhala mutthu olakaseiye. Ola oolakaseya, vano aarowasa. Oh, wuupuwela wira aiy'anyu aalakaseya, wala amwaar'inyu aalakaseya, ni—ni amwara a John aalakaseya, ni—ni—ni nno anamwane aalakaseya. Sothene sihiiraneya (exeeni ekhumelenle?), vano nyuwo moohiwa!

Oh, wunla xeeni n'ukhupanya atthu arimenle yasuwela-ru makiseryo aya,  
Awo yaahikhuwelela myala ni miyaako, (Ntoko Isarayeli, otthikelaka mmuttetheni, mpaani m'okokorela.)  
Awo yaahivekela masi mavekelo aya khiyaareere opisa. (Awo yaahikhotta Mutthaka.)

<sup>137</sup> Oh, munna, nnakhala muhiire siiso. Sothene siniir'anyu, mukhale oominyala wa niwoko! Ayo, mulopwana!

<sup>138</sup> Vano, mpakha nikumane, ninimwiira ela:

Mukuxe Nsina na Yesu ni nyuwo,  
Ntoko nikula na ovelavela wothene;  
Ottehattehiwa woorukureryani, (Muniira exeeni?)  
Muromole Nsina nenlo noowaarya nvekelaka.  
Nsina nooreerexa, Oh moota ninsivel'aya!  
Muroromelo wa mulaponi ni ohakalala wa Wirimu;  
Nsina nooreerexa, Oh moota ninsivel'aya!  
Muroromelo wa mulaponi ni ohakalala wa Wirimu.

<sup>139</sup> Nrowe nuurame miru sahu vano, niipaka muhina:

Nsina na Yesu nuurameliwe,  
Nikokhoraka munawoni Mwawe,  
Mwene a mwene Wirimu. . . omuwariha nleha,  
Mukwah'ahu waphiyaru okhomoni.  
(Enimwiiraneya, nihiku nlo.)

Oh, Nsina nooreerexa, Nsina nooreerexa, Oh, moota ninsivel'aya!

Mpakha nikumane-tho, Muluku akhale ni nyuwo.

Muroromelo wa mulaponi ni ohakalala wa Wirimu;  
Nsina nooreerexa, Oh moota ninsivel'aya!  
Moota ninsivel'aya!  
Muroromelo wa mulaponi ohakalala wa Wirimu.



*OKATHI WO WIIRAANA NI ETHOONYERYO* EMK63-0818

(The Uniting Time And Sign)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeettaka 18 mweeri wa Agosto, 1963, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)



## Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)